

明

史

八  
八



明史卷三百一十八

列傳第二百六

總裁官總理事務 經筵講官少保兼太子太保保和殿大學士兼管吏部戶部尚書事加六級張廷玉奉

敕修

廣西土司二

太平

思明

思恩

鎮安

田州

恩城

上隆

都康

太平漢屬交趾號麗江唐為羈縻州隸邕州都督府宋平嶺南於左右二江溪峒立五寨其一曰太平與古萬

遷隆永平橫山四寨各領州縣峒屬邕州建武軍節度元仍爲五寨後廢乃置太平路於麗江洪武元年征南將軍廖永忠下廣西左江太平土官黃英衍等遣使齎印詣平章楊璟降璟還自廣海帝問黃岑二氏所轄情形璟言蠻獠頑獷散則爲民聚則爲盜難以文治當臨之以兵彼始畏服帝曰蠻獠性習雖殊然其好生惡死之心未嘗不同若撫之以安靖待之以誠諭之以理彼豈有不從化者哉遣中書照磨蘭以權齋詔往諭左右兩江溪峒官民曰朕惟武功以定天下文德以化遠人此古先哲王威德並施遐邇咸服者也睠茲兩江地邊

南徼風俗質樸自唐宋以來黃岑二氏代居其間世亂則保境土世治則修職貢良由其審時知幾故能若此頃者朕命將南征入閩克靖兩廣平定爾等不煩師旅奉印來歸嚮慕之誠良足嘉尚今特遣使往諭爾其克慎乃心益懋厥職宣布朕意以安居民以權至廣西衛鎮撫彭宗萬戶劉維善以兵護送將抵兩江適來賓洞蠻寇掠楊家寨居民以權謂彭宗等曰奉詔遠來欲以安民今見賊不擊何以庇民乃督宗等擊之賊敗走遂安輯其地兩江之民由是懾服二年黃英衍遣使奉表貢馬乃改爲太平府以英衍爲知府世襲宣德元年崇

善縣土知縣趙暹謀廣地界遂招納亡叛攻左州執故  
土官奪其印殺其母大肆擄掠占據村洞四十餘所造  
火器建旗幟僭稱王署僞官流劫州縣事聞帝命總兵  
官顧興祖會廣西三司勦捕興祖等招之不服遣千戶  
胡廣率兵進暹扼寨拒守廣進圍之給出所奪各州印  
撫諭脇從官民使復職業暹計窮從間道遁伏兵邀擊  
及其黨皆就禽時左州土官黃榮亦奏蠻人李圓英劫  
掠居民僞稱官爵乞發兵勦捕帝謂兵部曰蠻民愚獷  
或挾私讐忿爭戕殺來告者必欲深致其罪未可遽信  
其令鎮遠侯并廣西三司勘實先遣人招撫如叛逆果

彰發兵未晚也二年斬南寧百戶許善初善知趙暹謀  
逆與之交通及總兵官遣善追暹又受暹馬十匹銀百  
兩故延緩之冀幸免事覺下御史鞫問得實斬之餘黨  
皆伏誅太平領州縣以十數明初皆以世職授土官而  
設流官佐之 太平州舊名瓠陽爲西原農峒地唐爲  
波州宋隸太平寨元隸太平路洪武元年土官李以忠  
歸附授世襲知州設流官吏目佐之 鎮遠州舊名古  
隴宋置隸邕州元隸太平路洪武初土官趙勝昌歸附  
授世襲知州設流官吏目佐之 茗盈州宋置隸邕州  
元隸太平路洪武初土官李鐵釘歸附授世襲知州設

流官吏目佐之 安平州舊名安山亦西原農峒地唐  
置波州宋析爲安平州元隸太平路洪武初土官李郭  
佑歸附授世襲知州設流官吏目佐之 思同州舊名  
永寧爲西原地唐置隸邕州宋隸太平寨洪武元年土  
官黃克嗣歸附授世襲知州設流官吏目佐之屬太平  
府萬曆二十八年省入永康州 養利州元屬太平路  
洪武初土官趙日泰歸附授知州以次傳襲宣德間稍  
侵其鄰境肆殺掠萬曆三年討平之改流官 萬承州  
舊名萬陽唐置萬承萬形二州宋省萬形隸太平寨元  
隸太平路洪武初土官許郭安歸附授世襲知州設流

官吏目佐之永樂間郭安從征交阯死於軍子永誠襲  
全茗州舊名連岡爲西原地宋置隸邕州元隸太平  
路洪武初土官李添慶歸附授世襲知州設流官吏目  
佐之 結安州舊名營周亦西原農峒地宋置結安峒  
隸太平寨元改州屬太平路洪武元年土官張仕榮歸  
附授世襲知州設流官吏目佐之 龍英州舊名英山  
宋爲峒元改州屬太平路洪武元年土官李世賢歸附  
授世襲知州割上懷地益其境設流官吏目佐之 結  
倫州舊名邦兜亦西原農峒地宋置安峒隸太平寨元  
改州屬太平路洪武二年峒長馮萬傑歸附授世襲知



州設流官吏目佐之 都結州元屬太平路土官農姓  
洪武初內附授世襲知州設流官吏目佐之 上下凍  
州舊名凍江宋置凍州元分上下凍二州尋合爲一屬  
龍州萬戶府洪武元年土官趙貼從歸附授世襲知州  
設流官吏目佐之屬太平府貼從死子福瑀襲永樂四  
年從征交趾死於軍 思城州亦西原農峒地唐置州  
宋分爲上下思城二州隸太平寨元至正間并爲一屬  
太平路洪武元年土官趙雄傑歸附授世襲知州設流  
官吏目佐之 永康州宋置縣隸遷隆寨元隸太平路  
土官楊姓成化八年其裔孫楊雄傑糾合峒賊二千餘

人入宣化縣劫掠且僞署官職總兵官趙輔捕誅之因  
改流官萬曆二十八年升爲州 左州舊名左陽唐置  
隸邕州宋隸古萬寨元屬太平路洪武初土官黃勝爵  
歸附授世襲知州再傳子孫爭襲相仇殺成化十三年  
改流官 羅陽縣舊名福利陀陵縣舊名駱陀皆宋置  
元隸太平洪武初土官黃宣黃富歸附並授世襲知縣  
設流官典史佐之

思明唐置州隸邕州宋隸太平寨元改思明路洪武初  
改爲府二年土官黃忽都遣使貢馬及方物詔以忽都  
爲思明府知府世襲十五年忽都復遣其弟祿政奉表

來貢詔賜鈔錠二十三年忽都子黃廣平遣思州知州黃志銘率屬部偕十五州土官李圓泰等來朝明年廣平以服闋遣知州黃忠奉表貢馬及方物詔廣平襲職賜冠帶襲衣及文綺十匹鈔百錠二十五年憑祥洞巡檢高祥奏思明州知州門三貴謀殺思明府知府黃廣平廣平覺而殺之乃以病死聞於朝所言不實詔逮廣平鞠之既至帝謂刑部曰蠻寇相殺性習固然獨廣平不以實言故繩以法今姑宥之使其改過命給道里費遣還是後朝貢如例二十九年土官黃廣成遣使人貢因奏言本府自故元改思明路軍民總管所轄左江一

路州縣峒寨東至上思州南至銅柱元兵征交阯去銅柱百里設永平寨軍民萬戶府置兵戍守命交人供其軍餉元季擾亂交人以兵攻破永平寨遂越銅柱二百餘里侵奪思明屬地邱溫如罄慶遠淵脫等五縣逼民附之以是五縣歲賦皆土官代輸前者本府失理於朝遂致交人侵迫益甚及告禮部任尙書立站於洞登洞登實思明地而交阯乃稱屬銅柱界臣嘗具奏蒙朝廷遣刑部尙書楊靖覈其事建武志尙可考乞敕安南俾還舊封庶疆域復正歲賦不虛帝令戶部錄所奏遣行人陳誠呂讓往諭安南三十年誠讓至安南諭其王陳

日焜令還思明地議論往復久而不決以譯者言不達意復爲書曉之安南終辯論不已出黃金二錠白金四錠及沉檀等香以賄誠却之安南復咨戶部無還地意廷臣議其抗命當誅帝曰蠻人怙頑不悛終必取禍姑待之永樂二年憑祥巡檢李昇言其地瀕安南百姓樂業生齒日繁請改爲縣以便撫輯從之以昇爲知縣設流官典史一員三年昇以新設縣治來朝貢馬及方物謝恩廣成奏安南侵奪其祿州西平州永平寨地請遣使諭還從之九年免思明稅糧以廣成言去秋雨水傷稼也宣德元年思明賀天壽節奉表踰期禮部請罪之

帝以遠蠻旣至母問土官知府黃瑠奏憑祥歲凶民饑命發龍州官倉糧振之正統七年瑠遣使入貢九年貢解毒藥味賜鈔錦景泰三年瑠致仕以子鈞襲瑠庶兄都指揮玠欲殺鈞代以己子玠守備潯州託言徵兵思明府令其子糾衆結營於府三十里外馳至府襲殺瑠一家支解瑠及鈞甕葬後圃仍歸原寨明日乃入城詐發哀遣人報玠捕賊以掩其迹方殺瑠時瑠僕福童得免走憲司訴其事且以徵兵檄爲證郡人亦言殺瑠一家者玠父子也副總兵武毅以聞將逮治之玠自度禍及乃謀迎合朝廷意遣千戶袁洪奏永固國本事請易

儲奏入帝曰此天下國家重事多官其會議以聞玘爲此舉衆皆驚愕謂必有受其賂而教之者或疑侍郎江淵云事成玘得釋罪且進秩英宗復辟玘聞自殺帝命發棺戮其屍其子震亦爲都督韓雍捕誅成化十八年土知府黃道奏所轄思明州土官孫黃義爲族人黃紹所殺乞發兵捕勦帝命兩廣守臣區處以聞弘治十年浞村賊黃紹侵占思明上石下石三州復謀殺知府黃道父子道妻趙氏累訴於朝且謂屢經委官勘問俱被賂免乞發兵誅之十一年紹集衆數千人焚劫鄉村據三州屢撫不下總鎮請發兵捕勦嘉靖四十一年以勦

平猺獞功命土官知州男黃承祖暫襲本職隆慶四年  
忠州土官黃賢相等據南寧府屬四都地作亂永康典  
史李材計誘其黨縛賢相以降萬曆十六年思明州土  
官黃拱聖謀奪襲殺其母兄拱極等五人而思明知府  
黃承祖乘亂掠村寨爲之援按臣請以拱聖及諸凶正  
法思明州改屬流府革承祖冠帶立功自贖而追其所  
掠更令族人黃恩護拱極妻許氏撫遺孤世延待其長  
官之三十二年總督戴耀奏思明叛目已禽土官黃應  
雷縱僕起釁棄印而逃斷難復官黃應宿爭地殺戮六  
哨成仇且係義子不應襲職黃應聘係承祖幼子人心



推戴似應承襲知府以存黃氏宗祀但年甫七歲暫令  
流官同知署府事待至十五歲交印接管應雷旣廢不  
宜同城應降爲土舍其後永襲土舍給田養贍制其出  
入應宿仍管故業俱屬思明府節制於府治設教授一  
員量給廩生六名其寄附太平府者悉歸本學嗣後續  
增其祭祀廩餼之用則地方可安文教可興詔悉從之  
崇禎十一年總督張鏡心疏報土官殺職官思明州黃  
日章黃德志等鼓衆叛逆帝令速禽首惡以靖地方論  
者以黃玠神奸身道大鑿世濟其兇傳及四世猶併思  
明州而有之王綱隳矣然骨肉相屠至是四見蓋天道

云 思明州東抵思明府西抵交趾界南抵西平州北  
抵龍英州土官黃姓與思明府同族洪武初黃君壽歸  
附授世襲知州屬思明府後爲黃玘所并萬曆十六年  
黃拱聖之亂改屬太平 上石西州宋屬承平寨元屬  
思明路明初屬思明府至萬曆三十八年改屬太平府  
州更土官趙氏何氏黃氏凡三姓皆絕始改流官 下  
石西州宋分石西州置元屬思明路洪武二年土官閉  
賢歸附授世襲知州設流官吏目佐之 忠州宋置隸  
邕州元屬思明路洪武初土官黃威慶率子中謹歸附  
授威慶江州知州中謹忠州知州皆世襲設流官同知

更目佐之其隣地有四峒者界於南寧思明忠江之間  
思明忠州屢肆侵奪副使翁萬達議改峒名四都隸之  
南寧地方稍定隆慶三年冬思明府土官黃承祖奏取  
四都地忠州土官黃賢相爭之遂擅立總管諸名目分  
兵數千戍守因縱令剽掠爲禍甚烈僉事譚惟鼎調永  
康典史李材以計禽賢相斃之於獄議改流官不果遂  
改隸州於南寧仍以州印予賢相子有瀚俾襲職 憑  
祥宋爲憑祥洞屬永平寨元屬思明路洪武十八年土  
蠻李昇歸附置憑祥鎮授昇巡檢屬思明府永樂二年  
置縣以昇爲知縣成化八年升爲州以昇孫廣寧爲知

州直隸布政司廣寧有十子廣寧死諸子爭立不決凡三四年乃以孫珠襲知州職嘉靖十年珠死族弟珍珏爭立珍挈印走況村珏攝州事十四年州目李清趙琪等謀納珍許思明府黃朝以州屬之朝遂以兵納珍於憑祥珏奔罄柳旣珍悔屬思明與朝隙朝乃以外婦所生子時芳詭云廣寧孫以兵千人納之時珍淫縱爲部民所怨於是廣寧季子寰以尊屬謀廢立十七年寰遂殺珍而附於安南莫登庸藉爲嚮導總督蔡經屬副使翁萬達禽之論死於是珏與時芳復爭立時芳倚思明勢州民皆右之萬達黜珏而論時芳死更立李佛嗣珍

爲知州憑祥遂定

思恩漢屬交阯唐爲思恩州屬邕乃澄州止戈縣地宋開寶間廢澄州以止戈賀水無虞三縣省入上林治平間以上林之止戈入武緣隸邕元屬田州路歷代羈縻而已明洪武二十二年田州府知府岑堅遣其子思恩州知州永昌貢方物二十八年歸德州土官黃碧言思恩州知州岑永昌旣匿五縣民不供賦稅仍用故元印章帝以不奉朝命命左都督楊文相機討之旣以荒遠不問永樂初改屬布政司時居民僅八百戶永昌死子瑛襲宣德二年瑛遣弟璫貢馬正統三年進瑛職爲知

府仍掌州事瑛有謀畧善治兵從征蠻寇屢有功故有是命因與知府岑紹交惡各具奏下總兵官及三司議於是安遠侯柳溥等請陞思恩爲府俾瑛紹各守疆土以杜侵爭從之六年瑛受屬挾詐事覺帝以土蠻宥不問令法司移文戒之瑛以府治僻隘橋利堡正當猺寇出沒之所且有城垣公廨乞徙置許之以思恩府爲思恩軍民府十二年設儒學置教授一員訓導四員俱從瑛請也景泰四年總兵官陳旺奏思恩土兵調赴桂林哨守者離本府遼遠不便耕種稅糧宜暫免從之六月以瑛親率本部狼兵韋陳威等赴城操練協助軍威敕

授奉議大夫賜綵緞韋陳威等俱給冠帶五年從瑛請  
建廟學造祭祀樂器又以瑛征勦搖寇功免土軍今年  
應輸田糧之半進瑛從二品散官瑛屢領兵隨征以子  
鎮代爲知府鎮招集無賴肆爲不法瑛舉發其事請於  
總兵回府治之鎮聞其父將至自縊死事聞嘉其能割  
愛効忠降敕慰諭又以柳溥奏免思恩調用土軍千五  
百人秋糧二千三百餘石天順元年戶部奏思恩存留  
廣西操練軍一千五百人有誤種田納糧乞分爲三班  
留五百人操練免其糧七百七十餘石放回千人耕種  
徵其糧千五百四十餘石俟寧靖日放回全徵從之三

年鎮守中官朱祥奏請量遷瑛都司軍職帝以瑛歷練老成累有軍功改授都指揮同知仍聽總兵官鎮守調用以其子鏊爲知府成化元年遣兵科給事中王秉彝齎敕獎諭瑛父子并賜銀幣二年命給瑛父母妻誥命從總兵趙輔請也十四年瑛卒瑛自襲父職頻年領兵於外多所斬獲歷陞知府參政都指揮使年且八十尚在軍中旣卒鏊以誥請帝念其勞特賜之十六年田州府土目黃明作亂知府岑溥避入思恩鏊會鎮守等官討平之巡撫朱英請獎鏊功鏊死子濬襲弘治十二年田州土官岑溥爲子琥所殺琥亦死次子猛幼頭目黃



驥李蠻構難督府命濬調衆護猛驥厚賂濬并獻其女且約分地與濬濬以兵屬驥送猛至田州不得入猛遂久留濬所及總鎮諸官攝濬乃出猛襲知府濬從索故分地不得怒約泗城東蘭二州攻劫田州殺掠萬計城郭爲墟濬兵二萬據舊田州劫龍州印納故知府趙源妻岑氏及總兵官詣田州勘治黃驥懼匿濬所先是濬築石城於丹良莊屯兵千餘人截江道以括商利官命毀之不聽會官軍自田州還乘便毀其城濬兵來拒殺官軍二十餘人官軍敗之俘其目兵九人總鎮及巡按等官請治濬罪而參政武清納濬賂曲護之濬從弟業

少從中官京師仕爲大理寺副三司總鎮請敕業往諭  
兵部以濬稔惡非業所能諭責宜敕鎮巡召濬至軍門  
諭以朝廷威德罪其首惡反侵地納所劫印并官私財  
物乃可赦總督鄧廷瓚奏濬屢撫不服請調官軍土兵  
分哨逐捕按問如集兵拒敵相機剿殺并將田州土官  
岑猛一并區處以靖邊疆十六年總督潘蕃奏濬僭叛  
當用兵誅勦今濬從弟岑業以山東布政司參議在內  
閣制敕房辦事禁密之地恐有泄漏吏部擬改調而業  
亦奏乞養去十七年濬掠上林武緣等縣死者不可勝  
計又攻破田州猛僅以身免掠其家屬五十人總鎮以

聞兵部請調三廣兵剿之十八年總督潘蕃太監韋經  
總兵毛銳調集兩廣湖廣官軍土兵十萬八千餘人分  
六哨副總兵毛倫右參政王璘由慶遠右參將王震左  
參將王臣及湖廣都指揮官纓由柳州左參將楊玉僉  
事丁隆由武緣都指揮金堂副使姜綰由上林都指揮  
何清參議詹璽由丹良都指揮李銘泗城州土舍岑接  
由工堯各取道共抵巢寨賊分兵阻險拒敵官軍奮勇  
直前援崖而進濬勢蹙遂入舊城諸軍圍攻之濬死城  
中人獻其首思恩遂平前後斬捕四千七百九十級俘  
男女八百人得思恩府印二向武州印一自進兵及班

師僅踰月捷聞帝以蕃等有功璽書勞之兵部議濬旣  
伏誅不宜再錄其後改設流官擇其可者以雲南知府  
張鳳陞廣西右參政掌思恩府事賜敕正德七年增設  
鳳化縣治時初設流官諸蠻未服相繼作亂嘉靖四年  
都御史盛應期遣官軍平之六年土目王受與田州盧  
蘇謀煽亂勢復熾新建伯王守仁受命至一意招撫而  
檄受等破八寨賊因列思恩地爲九土巡檢司管以頭  
目授王受白山司巡檢得比於世官又以思恩舊治瘴  
霧昏塞宜更之爽塏於是擇地荒田建新郡割武緣止  
戈二里益之又議割上林三里而移鳳化縣治於其處

蓋寓犬牙相錯之意巡撫林富謂遷郡及割止戈里應如守仁議至以三里當設衛而并鳳化縣裁之遂令府治益孤其後九司頭目日恣所轄蠻民不堪知府陳璜曲加綏戢日把劉觀盧回以復土爲名鼓衆作亂副使翁萬達因有事安南計禽盧回殺之招回從亂者三十餘人最後東蘭岑瑄詐稱岑濬子起雲謀復土官爲九司頭目所縛萬曆七年督撫吳文華謂九司日以驕黠編氓甚少緩急難恃奏割南寧武緣縣屬思恩自是思恩稱巨鎮云思恩府土巡檢九司皆嘉靖七年設曰興隆曰那馬曰白山曰定羅曰舊城曰下旺曰安定曰都

陽曰古零

鎮安宋時於鎮安峒建右江軍民宣撫司元改鎮安路  
明洪武元年鎮安歸附以舊治僻遠移建廢凍州改爲  
府授土官岑添保知府朝貢如例二十七年添保上言  
往者征南將軍傅友德令郡民歲輸米三千石運雲南  
普安衛鎮安僻處溪洞南接交阯孤立一方且無所屬  
州縣人民鮮少舟車不通陸行二十五日始到普安道  
遠而險一夫負米三斗給食餘所存無幾往往以耕牛  
及他物至其地易米輸納而普安荒遠米不易得民甚  
病之又歲輸本衛米四百石尤極艱難舊以白金一兩

折納一石今願依前例以蘇民困從之永樂中向武知州黃世鐵侵奪鎮安高寨等地朝廷遣兵討平之以其地屬鎮安成化八年知府岑永壽姪宗紹糾集士兵攻破府治殺傷嫡母流劫鄉村有司撫諭不服都指揮岑瑛禽斬之嘉靖十四年田州盧蘇作亂糾歸順州土官岑獻攻毀鎮安府目兵遇害者以萬計按臣曾守約以聞帝命新建伯王守仁治之時蘇倡亂田州無主鎮安府土官男岑真寶以兵納岑邦佐於田州歸順州岑獻蘇壻也及向武州黃仲金皆與真寶隙乘真寶入田州蘇遣獻及仲金襲破鎮安真寶聞亂走還蘇會目兵追

圍之武陵寨璫等遂發真寶父母墓焚其骸分兵占據諸洞寨真寶訴之軍門督諭璫等不退久之乃解官軍歸真寶於是璫與真寶互相訐巡按御史言土蠻自相讐非有所侵犯從未減於是蘇璫仲金各降罰有差真寶亦革冠帶許立功自贖二十二年以猺獞作亂防禦需人免真寶諸土官來朝鎮安所屬有上映洞湖潤寨巡檢皆土人世官

田州古百粵地漢屬交阯郡唐隸邕州都督府宋始置田州屬邕州橫山寨元改置田州路軍民總管府明興改田州府省來安府入焉後改田州領縣一曰上林洪



武元年大兵下廣西右江田州府土官岑伯顏遣使齎  
印詣平章楊璟降二年伯顏遣使奉表貢馬及方物詔  
以伯顏爲田州知府世襲自是朝貢如制六年田州溪  
峒蠻賊竊發伯顏討平之伯顏請振安州順龍州侯州  
陽縣羅博州龍威寨人民詔有司各給牛米仍蠲其稅  
二年十六年伯顏死子堅襲十七年都指揮使耿良奏  
田州知府岑堅泗州知州岑善忠率其土兵討捕猺寇  
多樹功績臣欲令選取壯丁各五千人立二衛以善忠  
之子振堅之子永通爲千戶統衆守禦且耕且戰此古  
人以蠻攻蠻之術也詔行其言二十年堅遣子思恩知

州永昌朝貢如例給賜永樂元年堅死子永通襲永通  
上隆州知州也州以瓊代而已襲父職正統八年賜知  
府岑紹誥命并封贈其父母妻天順元年田州頭目呂  
趙僞稱敵國大將軍張旗幟鳴鉦鼓率衆劫掠南丹州  
又據向武州武進伯朱瑛以聞兵部請命瑛及土官岑  
瑛勦捕三年巡撫葉盛奏田州叛目呂趙勢愈獗殺知  
府岑鑑占據地方僞稱太平王圖謀岑氏宗族冒襲知  
府職事帝命總兵速討四年巡按御史吳禎奏奉敕勦  
捕反賊呂趙選調官軍土兵攻破功饒婪鳳二關直擣  
府城呂趙攜妻子挾知州岑鐸等宵遁官軍追至雲南

富州奪回鐸等及其子若壻斬首四十九級賊衆悉降趙以數騎走鎮安府追及之斬趙及其子四人從賊十八人獲其妻孥及僞太平王木印無敵將軍銅印并鳳旗盔甲等物復委知府岑鏞仍掌府事撫安人民田州平帝遣使齎敕獎諭禎等并敕鏞謹守法度保全宗族成化元年遣兵科給事中王秉彝齎敕諭鏞并賜銀幣以兵部言其所部土官狼兵屢調勦有勞且有事於大藤峽也二年總兵官趙輔奏鏞從征有功請給誥命旌其父母并妻從之五年復以輔言予鏞官誥十六年田州頭目黃明聚衆爲亂知府岑溥走避思恩總督朱英

調參將馬義率軍捕明明敗走爲恩城知州岑欽所執并族屬誅之已溥復與欽交惡欽攻奪田州逐溥殺五十餘家時泗城州岑應方恃兵強復黨欽殺擄人民二萬六千餘與欽分割田州而據其地弘治三年總制遣官護溥之子猗入田爲欽所遏居潯州按察使陶魯率官軍次南寧欽拒敵敗走而應復援之入城陳兵以備巡撫秦紘請合貴州湖廣及兩廣兵勦之欽勢蹙乞兵於應遂匿應所總鎮官因檄應捕欽欽從應飲殺應父子於坐收其兵以拒官軍已而應弟岑接佯以兵送欽至田州界亦殺其父子以報事聞廷議仍命溥還田州

九年總督鄧廷瓚言溥前以罪革職比隨征有功乞復其冠帶領土兵赴梧州聽調從之十二年溥爲子猯所弑猯亦自殺次子猛方四歲溥母岑氏及頭目黃驥護之赴制府告襲歸至南寧頭目李蠻來迎驥慮蠻奪已權殺其使蠻率兵至舊田州驥懼誣蠻將爲變乞以兵納乃調思恩岑濬率兵衛猛濬受驥賂納其女挾猛約分其六甲地比至田州蠻拒不納驥復以猛奔思恩幽之事覺廷瓚檄副總兵歐磐等攝濬久乃出猛置於會城得奏命猛襲知府驥濬怒其事之不由已出也要泗城岑接東蘭韋祖鋹各起兵攻蠻接兵二萬先入田州

殺掠男女八百餘人驅之溺水死者無算括府庫放兵大掠城郭爲墟濬兵二萬攻舊田州據之殺掠男女五千三百餘人蠻逃去副總兵歐磐參政武清等詣田州府勸治遣兵送猛還府驥懼罪匿濬家有司請治濬罪初蠻之迎猛也無他念及猛在外蠻守土以待其歸驥爭權首亂濬接祖鉞黨惡以致茲變清受濬賂曲右之且誣蠻占據府治阻兵弄權事竟不直於是廷瓚言思恩岑濬罪惡正在逐捕而田州岑猛亦宜乘此區畫降府爲州毋基異日尾大之患從之十八年廷議以思田旣平宜設流官岑猛世濟兇惡致陷府治宜降授千戶

而遴選才望者假以方面職銜守田州仍賜敕以重其權帝然之於是以平樂知府謝湖爲右參政掌府事時岑猛已降福建平海衛千戶遷延不行及湖至復陳兵自衛令祖母岑氏奏乞於廣西極邊率部下立功以便祭養詔總鎮官詳議以聞總督陳金奏猛據舊巢要求府佐不赴平海衛參政謝湖不卽赴任爲猛所拒納餽遺而徇其要求宜逮問時猛遣人重賂劉瑾得旨留猛而禡湖并及前撫潘蕃劉大夏猛竟得以同知攝府事猛撫輯遺民兵復振稍復侵旁郡自廣嘗言督撫有調發願立功冀復舊職會江西盜起都御史陳金檄猛從

征猛所至剽掠然以賊平故論功遷指揮同知非猛初  
意頗怨望正德十五年猛奏田州土兵每征調輒許戶  
留一二丁耕種以供常稅其久勞於外者乞量振給免  
其輸稅從之嘉靖二年猛率兵攻泗城拔六寨遂克州  
治岑接告急於軍門言猛無故興兵攻寨猛言接非岑  
氏後據其祖業欲得所侵地時方有上思州之役徵兵  
皆不至總督張嶺以狀聞四年提督盛應期巡按謝汝  
儀議大征猛條征調事宜詔報可而應期以他事去詔  
以都御史姚鏞代命懸金購猛然鏞知猛無反心猛方  
奏辯鏞亦欲緩師而巡按謝汝儀與鏞郤乃誣鏞之子



涑納猛萬金廉得涑書獻之鎔惶恐乃再疏請征於是部趣鎔剋期進鎔偕總兵官朱麟發兵八萬以都指揮沈希儀張經等統之分道並入猛聞大兵至令其下毋交兵裂帛書寃狀陳軍門乞憐察鎔不聽督兵益急沈希儀斬猛長子邦彥於工堯隧猛懼謀出奔而歸順州知州岑璋猛婦翁也其女失愛璋欲藉此報猛乃甘言誘猛走歸順鳩殺之斬首以獻六年鎔以田州平告捷京師乃請改田州爲流官并陳善後七事詔俱從之鎔留參議汪必東僉事申惠參將張經以兵萬人鎮其地知府王熊兆署府事會必東惠皆移疾他駐惟經熊兆

在府兵勢分防守稍懈於是逆黨盧蘇王受等乃爲僞印誑言猛在且借交阯兵二十萬以圖興復蠻民信之聚衆薄府城經出擊兵少不敵欲引還而城中陰爲內應呼譟四出官軍腹背受攻力戰不支突圍渡江走賊逼其後爭舟溺死者甚衆賊沿江置闌索伏藥弩夾岸並起官軍且戰且行抵向武失士卒三四百人賊遂入據府城燒倉粟以萬計御史石金上其事頗委罪前撫盛應期生事召釁而給事中鄭自璧因請仍檄湖廣永順保靖兵併力勦賊帝以四方兵數萬方歸休豈可復調命再計機宜以聞時盧蘇等雖據府叛佯聽撫遣人

迎署府事王熊兆而其黨王受等糾衆萬餘攻據思恩城執知府吳期英守備指揮門祖蔭等已而釋期英等亦投牒上官願聽招撫都御史姚鏞以兵未集姑受之以緩其謀遣諜者檄東蘭歸順鎮安泗城向武諸土官各勒兵自効且責失事守巡參將等官立功自贖復疏調湖廣永保土兵江西汀贛畚兵俱會於南寧併力進勦帝以蠻亂日久鎮巡官受命大征未及殄絕輒奏捷散兵使餘孽復滋罪不容逭姑赦前過益圖新功乃起原任兵部尚書新建伯王守仁總督軍務同鏞討之時受旣入思恩封府庫以賊兵守之而自攻武緣守巡官

鄒輓等率兵至思恩思恩千夫長韋貴徐伍等遣壯士由間道入城爲內應夜引官兵奪門殺賊二十餘人收府印及庫物護送期英於賓州因招撫城中未下者時受攻武緣甚急參將張經堅壁拒守鎮守頭目許用與戰斬其渠帥一人賊見援兵大集乃遁去鏐以聞帝以田州思恩賊鋒雖挫首惡未禽仍令守仁亟督兵勦撫守仁威名素重及督軍務調兵數萬人至諸蠻心懾守仁至南寧道中見受等勢盛度亦未可卒滅上疏極陳用兵利害兵部議以守仁所見未確復陳五事令守仁詳計其宜於是守仁又疏云臣奉命於去年十二月至

廣西平南縣與巡按御史石金及藩臬諸將領等會議  
思田禍結兩省已踰二年今日必欲窮兵盡勦則有十  
患若罷兵行撫則有十善臣與諸臣攄心極論今日之  
局撫之爲是臣抵南寧遂下令盡撤調集防守之兵數  
日內解歸者數萬惟湖兵數千道阻遠不易卽歸仍使  
分留南寧解甲休養待間而動而盧蘇王受先遣其頭  
目黃富等訴告願得歸境投生乞宥一死臣等諭以朝  
廷威德令齋飛牌歸巢曉諭期以速降無死蘇受等得  
牌皆羅拜踴躍歡聲雷動尋率衆至南寧城下分屯四  
營蘇受等囚首自縛與頭目數百人赴軍門請命臣等

復諭之曰朝廷旣赦爾罪爾等擁衆負固騷動一方若不示罰何以雪憤於是下蘇受於軍門各杖一百乃解其縛又諭之曰今日宥爾死者朝廷好生之德必杖爾者人臣執法之義衆皆叩首悅服願殺賊立功臣隨至其營撫定其衆七萬餘人復委布政使林富等安插於二月二十六日悉命歸業是皆皇上至孝達順之德神武不殺之威未期月而蠻民率服不折一矢不傷一人而全活數萬生靈卽古舞干之化奚以加焉疏聞帝嘉之遣行人齎敕獎賚於是守仁復疏言思田久構禍荼毒兩省已踰二年兵力盡於哨守民脂竭於轉輸官吏

疲於奔走地方艱脆如破壞之舟漂泊風浪覆溺在目  
不待智者而知之矣必欲窮兵雪憤以殲一隅無論不  
克縱使克之患且不測况田州外捍交阯內屏各郡深  
山絕谷猺獠盤據使盡誅其人異日雖欲改土爲流誰  
爲編戶非惟自撤其藩籬而拓土開疆以資鄰敵非計  
之得也今岑氏世効邊功猛獨註誤觸法雖未伏誅聞  
已病死臣謂治田州非岑氏不可請降田州府爲田州  
而官其子以存岑氏之後查猛有二子長邦佐自幼出  
繼爲武靖州知州武靖當猺賊之衝邦佐才足制馭宜  
仍舊職而今所建州請以猛幼子邦相授吏目署州事

俟後遞陞爲知州以承岑氏之祀設土巡檢諸司卽以  
盧蘇王受等九人爲之以殺其勢添設田寧府統以流  
官知府以總其權從之惟以守仁所奏岑猛子與撫按  
所報異令再覆於是守仁言臣初議立岑氏後該府土  
目及耆老俱言岑猛本有四子長邦佐妻張氏出次邦  
彥妾林氏出次邦輔外婢所生次邦相妾韋氏出猛嬖  
溺林氏而張失愛故邦佐自幼出繼武靖邦彥旣死邦  
佐得武靖民心更代亦難其人欲立邦輔土目謂外婢  
所生名實不正惟邦相係猛正派質貌厚重堪繼岑氏  
故當時直謂猛子存者二人亦所以正名慎始杜後日



之爭也疏上如議行八年守仁於思田旣議設流官又議移南丹衛於八寨改思恩府城於荒田改設鳳化縣治於三里添設流官縣於思龍增築五鎮城堡於五屯及侍郎林富繼之又言田州界南寧泗城交通雲貴交趾爲備非一不宜改設流官南丹衛設在賓州旣不足以遙制八寨遷八寨又不得以還護賓州爲今日計獨上林之三里守仁所議設縣者可遷南丹衛於此夫設縣則割賓州之地以益思恩是顧彼而失此也遷衛則扼八寨之吭以還護賓州是一舉而兩得也然不宜屬田州而仍屬南寧爲便其議與守仁頗有異同詔從

富言初邦相兄邦彥有子芝依大母林氏瓦氏居官給  
養田其後邦相惡蘇專擅密與頭目盧玉等謀誅蘇及  
芝蘇知之會邦相又侵削二氏原食莊田二氏遂與蘇  
合謀以芝奔梧州赴軍門告襲蘇又爲芝疏請尋令人  
刺邦相邦相覺殺行刺者而蘇遂伏兵殺盧玉等以兵  
圍邦相宅誘邦相出乘夜與瓦氏縊殺之巡按御史曾  
守約以聞帝命守仁亟爲勘處蘇之殺邦相也歸順鎮  
安泗城向武諸土官羣起構難互相訐奏當事者謂以  
岑芝承襲未定田州無主致令隣封覬覦當給劄付令  
芝管事蘇又請早給芝冠帶以撫田州而自悔罪願裹

糧立功及追補累年所逋糧賦巡按御史諸演疏聞部議以土蠻自相讐殺當從未減皆令立功方准贖罪復官三十二年芝死子大壽方四歲土人莫葦冒岑姓及土官岑施相煽構亂提督郎檀奏令思恩守備張啟元暫駐田州鎮之報可三十四年田州土官婦瓦氏以狼兵應調至蘇州勦倭隸於總兵俞大猷麾下以殺賊多詔賞瓦氏及其孫男岑大壽大祿銀幣餘令軍門獎賞四十二年以平廣西徭獍功准岑大祿實受知州職泰昌元年總督許弘綱奏田州土官岑懋仁肆惡起釁窺占上林納叛人黃得隆等糾衆破城擅殺土官黃德勳

擄其妻女印信乞正其罪詔令岑懋仁速獻印執送諸  
犯聽按臣分別正法違則進勦天啟二年巡撫何士晉  
請免懋仁逮問各率土兵援勦有功優敘從之田州世  
岑氏改流者再而終不果盧蘇再叛弒主終逸於罰論  
者以爲失刑云上林在田州東宋置隸橫山寨元屬田  
州路洪武二年土官黃嵩歸附授世襲知縣流官典史  
佐之

恩城州唐置宋元仍舊明初因之隸廣西布政司朝貢  
如例成化十九年知州岑欽田州土官岑溥叔也相讐  
殺溥敗欽入田州焚府治大肆殺掠溥愬於制府下三

明史卷三十八 列傳 三  
司官鞠理弘治三年欽復入田州與泗城土官岑應分據其地巡撫秦竝請調兵勦之兵部言兵不可輕動惟令守臣諭令應縛欽自贖五年欽走岑應所借兵總鎮檄應捕之欽遂殺應父子已而應弟接伴以兵送欽亦殺欽父子有司以恩城宜裁革從之州遂廢

上隆州宋置隸橫山寨元屬田州路明因之後改隸布政司洪武十九年上隆知州岑永通遣從子岑安來貢賜綺帛鈔錠洪熙元年土官知州岑瓊母陳氏來朝貢馬賜鈔幣宣德四年以陳氏爲知州時瓊已卒無子土人訴於朝願得陳氏襲職故有是命

都康州宋置隸橫山寨元屬田州路洪武間爲蠻獠所據三十二年復置隸布政司土官馮姓其界東南抵龍英西至鎮安北至向武

明史卷三百十八終



明史卷三百一十九

列傳第二百七

總裁官總理事務 經筵講官保兼太子太保保和殿大學士兼管兵部尚書事加級張廷壽奉

敕修

廣西土司三

泗城

利州

龍州

歸順

向武

奉議

江州

思陵 廣東瓊州府附

泗城州宋置隸橫山寨元屬田州路其界東抵東蘭西抵上林長官司南抵田州北抵永寧州洪武五年征南



副將軍周德興克泗城州土官岑善忠歸附授世襲知州十三年善忠子振作亂寇利州廣西都司討平之十四年善忠來貢方物二十六年振遣人貢馬及方物詔賜以鈔錠宣德元年女土官盧氏遣族人岑臺貢馬及銀器等物賜賚有差八年致仕女土官盧氏奏襲職土官岑豹率土兵千五百餘人謀害己又棄毀故土官岑瑄塑像所爲不孝難俾襲職豹叔利州知州顏亦奏豹興兵謀殺盧氏州民被害都督山雲奏豹實故土官瑄姪人所信服應襲職盧氏瑄妻豹伯母初借襲今致仕宜量撥田土以贍終身仍請敕豹無肆侵擾兵部請從

雲奏帝命行人章聰侯璉齋敕諭雲會三司巡按究豹與盧氏是非從公判決正統元年豹遣人入貢二年豹攻利州掠其叔顏妻子財物朝廷官至撫諭負固不服增兵拒守雲以聞乞發兵勦之帝敕雲曰蠻夷梗化罪固難容然興師動衆事亦不易其更遣人諭之五年顏奏豹侵占及掠擄罪頭目黃祖亦奏豹殺其弟籍其家瑄女亦奏豹占奪田地人民囚其母盧氏帝復遣行人朱昇黃恕齋敕諭之并敕廣西貴州總兵官親詣其地令速還所侵掠如不服相機禽捕正德六年總兵官柳溥奏行人恕昇同廣西三司委官諭豹退還原占利州

地豹時面從及回占如故今顏欲以利州利甲等莊易泗城古那等甲開設利州衙門宜從其請發附近官軍送顏赴彼撫治蠻民倘豹仍拒逆則率兵勦捕從之八年豹遣人奉貢賜綵幣十年豹復奏顏占據其地帝令速予議處不可因循貽邊方害成化元年豹聚衆四萬攻劫上林長官司殺土官岑志威據其境土兵部言豹強獷如此宜調兵禽捕明正典刑從之未幾豹死弘治三年土官知州岑應復據上林長官司及貴州鎮寧等處一十八城時恩城土官岑欽攻奪田州府遂知府岑溥應與欽黨旣復相讐兩家父子交相讐殺事聞兵部

奏欽連年構禍而應黨之復據上林長官司流毒不少  
今天厭禍假手相殘實地方之幸應所占鄰壤及土官  
印信數多亦宜勘斷以除禍本并令應弟接退還侵地  
及印信乃許承襲泗城地廣兵多宜選頭目量授職銜  
分轄以殺其勢詔下總鎮官區處接遣人朝正賜綵緞  
鈔錠十年總督鄧廷瓚奏接往年隨征都勻府江等處  
有功乞畧其祖父罪令承襲世職以圖報効廷臣議劫  
印侵地雖係接祖父罪然再四撫諭接不肯歸之於官  
遽使襲職則志益驕非馭土官法十二年田州土目黃  
驥作亂要接爲聲援殺掠男婦劫燒倉庫民廬又劫府

學及橫山驛印記遂據興仁十四年貴州賊婦米魯作亂提督王軾請調接領土兵二萬營於砦布河因敕接自備兩月餉剋期赴調十八年泗城土官族人岑九仙奏自始祖岑彭以來世襲土官至豹子應罹欽之禍子孫滅亡殆盡其弟接衆推護印累著勞勩乞令襲職俾掌轄蠻衆兵部尚書劉大夏等議豹乃叛臣餘孽子應復自取滅亡今接者人皆傳稱爲梁接非應親枝又不  
知岑九仙是何逋逃冒爲奏擾臣大夏先在兩廣見岑氏譜岑之始祖木納罕於元至正年間與田州知府之祖伯顏一時受官今九仙妄援漢岑彭世次塵瀆聖聽

請治其罪其岑接應襲與否前已令鎮巡官勘奏岑九  
仙雖蠻人難以深究亦當摘發以破其奸從之正德十  
二年泗城及程縣各遣官族來貢後期賞減半泗城貢  
厚仍全給之嘉靖二年田州岑猛率兵攻泗城拔六寨  
進薄州城克之接告急軍門言猛無故攻寨猛言接非  
岑氏後據其祖業欲得所侵地詔下勘處十六年田州  
盧蘇作亂泗城土舍岑施以兵納岑邦佐兵敗弗克納  
二十七年詔土舍施襲替免赴京以嘗聽調有勞也隆  
慶二年泗城蠻黃豹黃豸等據貴州程番府麻嚮大華  
等司時出擄掠官軍勦之豹等遁去萬曆二年泗城土

官岑承勲等貢馬及香鑪等物四十一年土官岑雲漢貢方物初雲漢乃紹勲嫡嗣紹勲寵庶孽雷漢頭目黃瑪等從中煽禍以至焚劫稱兵雲漢給母出印扶弟以奔撫按以聞廷議請釋紹勲罪以存大倫杖雷漢黃瑪等以息鬻孽雲漢從寬削銜戴罪管事詔可天啟二年巡撫何士晉請復雲漢知州職量加都司職銜令率土兵援黔從之泗城延袤頗廣兵力亦勁與慶遠諸州互相雄長其流惡自豹而應而接且三世領縣一曰程縣長官司二曰安隆曰上林程縣在泗城州之東北舊號程丑莊明初歸附隸泗城州洪武二十一年改爲縣

編戶一里後改屬慶遠府尋復隸泗城州設流官知縣  
正統間爲岑豹所逼棄官遁去典史攝印旋亦罹害豹  
遂奪其印據縣治事聞屢遣官諭之歷岑應岑接凡七  
十餘年不服嘉靖二年接爲諸土官攻殺督府遣官按  
問得縣印貯於官後僅存荒土泗城南丹那地俱欲得  
之時治兵相攻云 安隆長官司東抵泗城西抵雲南  
南抵上林長官司北抵貴州宣慰司元泗城州地也洪  
武元年泗城州土官岑善忠以次子子得領安隆峒三  
十年子得來朝貢馬設治所永樂元年設安隆長官司  
以子得爲長官撫其衆十二年貢馬賜鈔幣子世襲



上林長官司東北俱抵泗城界西抵安隆長官司南抵雲南宋元號上林峒屬泗城州明興因焉永樂初置長官司以泗城州土官岑善忠三子子成爲長官撫其民永樂四年子成遣子保貢方物賜鈔幣自是貢賜不絕成化元年泗城岑豹攻劫上林殺長官志威滅其族劫印占其境土兵部移文議豹罪仍以地與印給上林弘治三年上林長官司遣頭目入貢禮部以過期至給半賞旣而泗城岑應復奪據上林長官司然正嘉隆萬間朝貢猶時至

利州漢屬交趾號阪麗莊宋建利州隸橫山寨元因焉

土官亦岑姓洪武初歸附授知州以流官吏目佐之直隸布政司宣德二年利州知州岑顏遣頭目羅嚮貢馬正統元年泗城岑豹侵據利州地并掠顏妻子財物總兵官山雲以聞帝敕鎮巡官撫諭之四年顏遣族人岑忻貢銀器方物五年顏奏本州地二十五甲被豹興兵攻占母覃被囚妻財被掠累奉敕撫諭猖獗不服帝遣行人黃恕朱昇敕諭豹事具前傳七年豹復與顏相仇殺帝敕總兵官吳亮宣布恩威令各罷兵而豹終殺顏及其子得奪州印去遂以流官判州事數十年間屢經諸司勘奏移檄督追歷岑應岑接二世如故嘉靖二年

歸併泗城

龍州古百粵地漢屬交阯宋置龍州隸太平寨元大德  
中陞州爲萬戶府洪武二年龍州土官趙帖堅遣使奉  
表貢方物詔以帖堅爲龍州知州世襲八年改隸廣西  
布政司時帖堅言地臨交阯所守關隘二十七處有警  
須申報太平達總司比報下已涉旬月恐誤事機乞依  
奉議泗城二州隸廣西便從之十六年帖堅以孝慈皇  
后喪上慰表貢馬及方物賜綺帛鈔錠有差二十一年  
帖堅病無子以其從子宗壽代署州事帖堅卒宗壽襲  
鄭國公常茂以罪謫居壽州帖堅妻黃氏有二女一爲

太平州土官李圓泰妻茂納其一爲妾時宗壽雖襲職帖堅妻猶持土官印與茂圓泰專擅州事數陵逼宗壽會茂以病卒其閹者趙觀海等亦肆侮宗壽宗壽乃與把事等以計取土官印上奏言茂已死并械觀海等至京於是帖堅妻惶懼使人告宗壽擄掠又與圓泰謀劫茂妾并其奴婢往太平州又盡掠趙氏祖父官誥諸物又欲併取龍州之地乃自至京告宗壽實從子不應襲宗壽亦上章言狀帝乃詔宗壽勿問下吏議帖堅妻與圓泰罪旣而以遠蠻俱釋之久之復有人告茂匿龍州未死前宗壽所言皆妄遂詔右軍都督府榜諭宗壽及

龍州官民言昔鄭國公常茂有罪上以開平王之功不忍遽置於法安置龍州土官趙帖堅故其妻與茂結爲婚姻誘合諸蠻肆爲不道帖堅姪宗壽襲職與黃氏互相告訐言茂已死上以功臣子猶加憐憫釋二人告訐罪今有人言茂實未死宗壽等知狀已遣散騎舍人諭宗壽捕茂延玩使者久不復命其意莫測特命榜諭爾宗壽等知之如茂果存則送至京師以贖罪如茂果死宗壽亦宜親率大小頭目至京具陳其由廣西布政司言宗壽屢詔赴京拒命不出又言南丹奉議等蠻梗化帝復命致仕兵部尚書唐鐸往諭宗壽訖不從命詔發

湖廣江西所屬衛所馬步官軍六萬餘各齎三月糧期以秋初俱赴廣西命都督楊文佩征南將軍印爲總兵官都指揮韓觀爲左將軍都督僉事宋晟爲右將軍劉眞爲參將率京衛馬步軍三萬人至廣西會討龍州及奉議南丹向武等州叛蠻師行帝撰文遣使祭嶽鎮海瀆復遣禮部尚書任亨泰監察御史嚴震直使安南諭以討龍州趙宗壽之故令陳日焜慎守邊境毋助逆勿納叛遣人諭文調南寧衛兵千人江陰侯吳高領之柳州衛兵千人安陸侯吳傑領之皆令其建功自贖又詔文等如兵至龍州宗壽親來見具陳茂已死之由則宥

其罪若詐遣人來則進兵討之既鐸還京言宗壽伏罪來朝乞罷兵勿征詔文移兵於奉議仍命鐸至軍參軍事宗壽偕耆民農里等六十九人來朝謝罪貢方物宗壽死子景升襲景升死無嗣以叔仁政襲仁政再傳爲趙源源死無子思恩土官岑濬率兵攻田州回劫龍州奪其印納故知府源妻岑氏詔下鎮巡官勦賊而議立爲源後者以源庶兄浦有二子相居長當立相弟楷不能無望則謀於岑氏以僕韋隊子璋詭云遺腹岑氏恃兄子猛方兵雄楷遂奏言璋實源子當立爲相所篡事下督府勘未決璋賂鎮守太監傅倫舍人詭稱有詔檄

猛調二萬兵納璋入龍州左江大震相挈印奔況村都御史楊旦討璋猛殺之相乃歸相二子長燧次寶相枝拇寶亦枝拇相絕愛之曰肖我當立猛乃以寶去髡爲奴嘉靖元年相死州人立燧楷弑之州人立其族弟煖時王守仁提督兩廣幕客岑伯高用事楷賂伯高言煖非趙氏裔當立者楷也遣上思州知州黃熊兆覈之熊兆黨伯高言楷當立以州印畀楷楷遂殺煖龍州大亂州目黃安等潛往田州購寶寶時爲奴楊布家十三年矣安等行百金購得之言之督府都御史林富謂楷勢已張毋持之急乃令楷攝職俟寶長讓之楷復時時謀



殺寶富諭楷令以印還寶寶謝以五千金益以腴田三十一村楷計寶弱易與不如邀厚利而徐圖之遂聽命楷復求韋璋之子應育之令往來寶所寶妻黃氏思明府土官黃朝女也貳於寶而與應通應乃厚結州目又數遣人與向武州締好乞兵爲衛寶日荒悍刑狡男子王良爲閹楷知良恨寶激使內應良許之楷以千人夜至寶寢門呼良良開門納楷兵執寶寢所斬之以他盜聞應以兵千人據州并結朝自援都御史蔡經屬副使翁萬達謀之萬達謂楷狙詐未可速圖韋應異懷寡慮可旦夕禽斷其中堅然後可次第獲督撫善之萬達行

部至太平使人以他事召朝諭之計論應當死言楷才  
勇正須藉爲龍州當一面耳時諸言楷事者故不爲理  
州人大譁萬達愈厚楷楷信之遂統精兵千人詣萬達  
言狀并以三十一村地獻萬達召楷及州目鄧瑀等入  
見伏壯士劫之曰汝罪大宜自爲計誠死尚可爲爾子  
留一官楷自分無生理乃手書諭其黨曰業已如此亂  
無益也可善輔我子以存趙萬達卽杖楷斃之以楷書  
諭其州人時楷子匡時生四年矣立之一州悉定乃以  
十三村還龍州十八村隸崇善縣於是龍州趙氏仍得  
襲

歸順州舊爲峒隸鎮安府永樂間鎮安知府岑志綱分其第二子岑永綱領峒事傳子瑛屢率兵報効弘治九年總督鄧廷瓚言鎮安府之歸順峒舊爲州治洪武初裁革今其峒主岑瑛每効勞於官乞設州治授以土官知州凡出兵令備土兵五千仍歲領土兵二千赴梧州聽調詔從之增設流官吏目一員瑛死子璋襲復從璋奏以本州改隸布政司璋多智畧田州岑猛以不法獲譴都御史姚鏌將舉兵討之璋猛婦翁也鏌慮璋黨猛召都指揮沈希儀謀希儀雅知璋女失寵恨猛又知部下千戶趙臣雅善璋希儀因使趙臣語璋圖猛璋受命

時猛子邦彥守工堯隘璋詐遣兵千人助邦彥言天兵  
至以姻黨故且與爾同禍今發精兵來幸努力堅守邦  
彥欣納之璋遣人報希儀曰謹以千人內應矣時田州  
兵殊死拒戰諸將莫利當隘者希儀獨引兵當之約戰  
三合歸順兵大呼曰敗矣田州兵驚潰希儀麾兵乘之  
斬首數千級邦彥死焉猛聞敗欲自經而璋先已築別  
館使人請猛時猛倉皇不知所出遂挈印從璋使走歸  
順璋詭爲猛草奏促猛出印實封之璋旣知猛印所在  
乃鳩殺猛斬其首并府印函之間道馳軍門爲讒言所  
阻竟不論功璋死次子璫襲嘉靖四年提督盛應期以

明史卷三百九 列傳 十一  
璣先助猛逆攻泗城許自新出兵討賊自贖從之十四  
年田州盧蘇叛糾璣攻鎮安府璣破鎮安并發岑真寶  
父母墳墓事聞革冠帶許立功贖璣後從征交阯卒於  
軍子代襲萬曆間以貢馬違限給半賞

向武州宋置隸橫山寨元隸田州路其界東北抵田州  
西抵鎮安南抵鎮遠洪武二年七月土官黃士鐵遣使  
貢馬及方物詔以世鐵爲向武州知州許世襲二十一  
年廣西布政司言向武州叛蠻梗化時都督楊文佩征  
南將軍印討龍州奉議等處復奉命移師向武文調右  
副將軍韓觀分兵進討都康向武富勞諸州縣斬世鐵

以兵部尚書唐鐸言置向武州守禦千戶所永樂二年  
土官知州黃彧遣頭目羅以得貢馬賜鈔幣宣德四年  
故土官知州黃謙昌子宗蔭貢馬賜鈔嘉靖四年田州  
岑猛叛向武土官以兵助猛提督盛應期議大征檄向  
武出兵討賊以功贖罪十六年田州盧蘇叛鎮安土官  
岑真寶以兵納岑邦佐蘇求助於向武時土官黃仲金  
怨真寶遂與合兵破鎮安事聞革仲金冠帶二十七年  
以仲金聽調有勞詔許承襲原職免赴京四十二年又  
以勦平徭寇功加仲金四品服向武領縣一日富勞元  
置洪武間爲蠻獠所據建文時復置仍隸向武州永樂

明倫彙編 家範典 卷一百一十九 列傳 三  
初省武林入焉土官亦黃氏世襲

奉議州宋置初屬靜江軍後屬廣西經畧安撫司元屬廣西兩江道宣慰司洪武初土官黃志威舊爲田州府總管來歸附二年詔授其子世鐵爲向武州知州世襲三年志威入朝貢六年招撫奉議等州百十七處人民皆款服帝嘉志威功命以安州侯州陽縣屬之七年以志威爲奉議州知州兼守禦直隸廣西行省二十六年奉議州知州黃嗣隆遣人貢馬及方物賜以鈔錠二十八年廣西布政司言奉議南丹等處蠻人梗化時都督楊文討龍州伏罪帝命移兵奉議勦賊遣使論文等近

聞奉議兩江溪峒等處林木陰翳蛇虺遺毒草莽中雨  
過流毒溪澗飲之令人死師入其地行營駐劄勿飲山  
溪水泉恐餘毒傷人宜鑿井以飲爾等其慎察之文發  
廣西都司及護衛官軍二萬人調田州泗城等土兵三  
萬八千九百人從征師至奉議州蠻寇聞官軍至悉竄  
入山林據險自固文督諸將分兵捕之復調參將劉真  
等領兵分道攻南丹叛寇初文等駐師奉議州之東南  
分兵追捕賊黨且遣人招降其脅從者賊皆焚廬舍走  
山谷憑險阻立柵自固文督將士屢攻破之賊衆潰散  
左副將軍韓觀等遂分兵追討都康向武富勞上林諸



州縣破其更吾蓮花大藤峽等寨斬向武土官黃世鐵并其黨萬八千三百餘人招降蠻民復業者六百四十八戶徙置象州武山縣蠻寇遂平時兵部尚書致仕唐鐸參議軍事以朝廷嘗命征勦畢日置衛守之乃會諸將相度形勢置奉議等衛并向武河池懷集武仙賀縣等處守禦千戶所設官軍鎮守詔從其言宣德二年署州事土官黃宗允遣頭目貢馬正統五年宗允科斂劫殺甚且欲戕其母母避之殺母侍者以洩怒爲母所告僉事鄧義奏其事帝敕總兵官柳溥及三司按驗以聞嘉靖四年田州岑猛叛奉議土官嘗助猛攻泗城州至

是提督盛應期言許其自新令出兵討賊以功贖罪後  
土官知州死皆以土判官掌州事論者以奉議彈丸地  
三面交迫田州獨南界鎮安其勢甚蹙明初置衛銓官  
如宋元故事蓋欲中斷田鎮以伐其謀云

江州界東抵忠州西抵龍州南抵思明北抵太平府其  
州宋置隸古萬寨元屬思明路明初土官黃威慶歸附  
授世襲知州設流官吏日以佐之直隸布政司嘉靖四  
十二年以平猺獞功准江州土官子黃恩暫署本職領  
縣一曰羅白洪武初土官梁敬賓歸附授世襲知縣敬  
賓死子復昌襲永樂間從征交趾被陷子福里襲

思陵州宋置屬永平寨元屬思明路洪武初省入思明府二十一年復置思陵州二十七年土官韋延壽貢馬及方物宣德四年護印土官韋昌來朝貢馬賜鈔幣正統間貢賜如制其界東至忠州西北至思明南至交阯瓊州居環海中漢武帝平南粵始置珠崖儋耳二郡歷晉隋唐宋叛服不一事具前史元改置瓊州路屬海北海南道宣慰司天曆初改乾寧軍民安撫司洪武元年征南將軍廖永忠平廣東改乾寧安撫司爲瓊州府以崖州吉陽軍儋州萬安軍俱爲州南建州爲安定縣隸焉六年儋州宜倫縣民陳昆六等作亂攻陷州城廣東

指揮使司奏言近儋州山賊亂已調兵勦其儋萬二州  
山深地曠宜設兵衛鎮之詔置儋萬二州守禦千戶所  
七年儋州黎人符均勝等作亂海南衛指揮張仁率兵  
討平之又海南羅屯等洞黎人作亂千戶周旺等討平  
之澄邁縣賊王官舍亂典史彭禎領民兵捕斬之十五  
年萬崖二州民陳鼎叔等作亂陷陵水縣爲海南衛官  
軍擊敗追至藤橋斬鼎叔等三百餘人餘黨悉平十七  
年儋州宜倫縣黎民唐那虎等亂海南衛指揮張信發  
兵討之那虎及其黨鄭銀等敗遁信追禽之送京師知  
州魏世吉受賄縱銀去帝謂兵部曰知州不能捕賊及

官軍捕至而反縱之乎命遣力士卽其州杖世吉責捕所縱者永樂三年廣東都司言瓊州所屬七縣八洞生黎八千五百人崖州抱有等十八村一千餘戶俱已向化惟羅活諸洞生黎尚未歸附帝命遣通判劉銘齋敕撫諭之御史汪俊民言瓊州周圍皆海中有大小五指黎母等山皆生熟黎人所居比歲軍民有逃入黎洞者甚且引誘生黎侵擾居民朝廷屢使招諭黎性頑狠未見信從又山水峻惡風氣亦異罹其瘴毒鮮能全活近訪宜倫縣熟黎峒首王賢祐嘗奉命招諭黎民歸化者多請仍詔賢祐量授以官俾招諭未服戒約諸峒無納

逋逃其熟黎則令隨產納稅悉免差徭其生黎歸化者  
免稅三年峒首則量所招民數多寡授以職如此庶幾  
黎人順服從之遣知縣潘隆本齋敕撫諭四年瓊州屬  
縣生黎峒首羅顯許志廣陳忠等三十三人來朝初以  
生黎多未向化遣銘招撫至是向化者萬餘戶顯等從  
銘來朝且乞以銘撫其衆帝遂授銘瓊州知府專職撫  
黎仍授顯等知縣縣丞巡檢等官賜冠帶鈔幣遣還自  
是諸黎感悅相繼來歸瓊山臨高諸縣生黎峒首王罰  
鍾異王琳等來朝命爲主簿巡檢六年銘復率土黎峒  
首王賢祐王惠王存禮等來朝貢馬命賢祐爲儋州同

知惠存禮爲萬寧縣主簿八年文昌縣斬脚寨黎首周振生等來歸賜以鈔幣俾仍往招諸峒九年臨高縣典史王寄扶奉命招至生黎二千餘戶而以峒首王乃等來朝命寄扶爲縣主簿并賜王乃等鈔十一年瓊山縣東洋都民周孔洙招諭包黎等村黎人王觀巧等二百三十戶願附籍爲民從之臨高民黃茂奉命招撫深峒那呆等二十四峒生黎率黎首王聚符喜等來朝貢馬黎民來歸者戶四百有奇通計前後所撫諸黎共千六百七十處戶三萬有奇蓋皆本廟算云十四年王賢祐率生黎峒首王撒黎佛金等來朝貢帝嘉納之命禮部

曰黎人遠處海南慕義來歸若朝貢頻繁非存撫意自  
今生黎土官峒首俱三年一貢著爲令十六年感恩土  
知縣樓吉祿率峒首貢馬十九年寧遠土縣丞邢京率  
峒首羅淋朝貢時崖州民以私忿相戰鬪衛將利漁所  
欲發兵勦之瓊州知州王伯貞執不可曰彼自相仇殺  
耳非有寇城邑殺良民之惡不足煩官軍衛將不從伯  
貞乃遣寧遠縣丞黃童按視果仇殺逮治數人黎人遂  
安宣德元年樂會土主簿王存禮等遣黎首黎寧及萬  
州黎民張初等來貢帝謂尚書胡濙曰黎人居海島不  
識禮儀叛服不常昔專設官撫綏今來朝當加賚之九



月澄邁縣黎王觀珠瓊山縣黎王觀政等聚衆殺瓊山  
土知縣許志廣流劫鄉村殺掠人畜命廣東三司勘實  
討之二年指揮王瑀等追捕黎賊兵至金雞嶺賊率衆  
拒敵敗之生禽賊首王觀政及從賊二百六十二人斬  
首二百六十七級餘衆潰奔走入山招撫復業黎八百  
一十二戶以捷聞械送觀政等至京帝謂尚書蹇義曰  
蠻性雖難馴然至爲變必有激宜嚴戒撫黎諸官寬以  
馭之若生事激變國有常刑正統九年崖州守禦千戶  
陳政聞黎賊出沒偕副千戶洪瑜領軍搜捕賊乃圍熟  
黎村黎首出見政等輒殺之又令軍旗孫得等十五人

焚其廬舍殺其妻孥數人擄其財物各黎激變政及官軍百人皆爲所殺巡按御史趙忠以聞坐瑜激變律斬景泰三年敕萬州判官王琥曰以爾祖父能招撫黎人特授土官爾能繼承父志亦既有年茲特降敕付爾撫諭該管村峒黎人各安生業不得倣倣別峒生黎所爲其官軍亦不得擅入村峒擾害激變天順五年敕兩廣巡撫葉盛以海南賊五百餘占據城池可馳至瓊相機撫捕勿使滋蔓弘治二年崖州故土官陳迪孫冠帶舍人陳崇祐朝貢以其能撫黎人之逋逃復業者厚賜之十五年黎賊符南蛇反鎮兵討之不下戶部主事馮頤

明史紀事本末卷之九十九 叛亂 一  
奏府治在大海南有五指山峒黎人雜居外有三州十  
縣一衛十一所永樂間置土官州縣以統之黎民安堵  
如故成化間黎人作亂三度征討將領貪功殺戮無辜  
迨弘治間知府張桓余濬貪殘苛斂大失黎心釀成今  
日南蛇之禍臣本土人頗知事勢乞仍考原設應襲土  
官子舍使各集土兵可得數萬聽鎮巡官節制有能禽  
首惡符南蛇者復其祖職以蠻攻蠻不數月可奏績矣  
詔從之嘉靖十九年總督蔡經以崖萬二州黎岐叛亂  
攻逼城邑請設參將一員駐劄瓊州分守二十八年崖  
州賊首那燕等聚衆四千人爲亂詔發兩廣官軍九千

勦之給事鄭廷鵠言瓊州諸黎盤居山峒而州縣反環  
其外其地彼高而我下其土彼膏腴而我鹹鹵其勢彼  
聚而我散故自開郡來千六百餘年無歲不遭黎害然  
無如今日甚矣今日黎患非九千兵可辦必添調狼土  
官兵兼召募打手集數萬衆一鼓而四面攻之然後可  
克嘗考勦除黎患其大舉有二元至元辛卯曾空其穴  
勒石五指山其時雖建屯田府立定安會同二縣惜其  
經畧未盡故所得旋失嘉靖庚子又嘗大渡師徒攻毀  
巢岡無處不至於是議者謂德霞地勢平衍擬建城立  
邑招新民耕守業已舉行中道而廢旋爲賊資以至復

有今日謹條三事一崖黎三面郡縣惟東南連郎溫脚二峒岐賊實當萬州陵水之衝崖賊被攻必借二峒東江以分我兵勢計須先分奇兵攻二峒而以大兵徑擣崖賊彼此自救不暇莫能相顧則殲滅可期傳聞賊首那燕已入凡陽構集岐賊此必多方誤我且訛言搖惑以堅諸部助逆之心宜開示慰安以解狐疑之黨一隋唐郡縣輿圖可考今多陷入黎中蕩平後悉宜恢復并以德霞千家羅活等膏腴之地盡還州縣設立屯田且耕且守仍由羅活磨斬開路以達安定由德霞沿溪水以達昌化道路四達井邑相望非徒懾奸銷萌而王路

益開拓矣一軍威旣振宜建參將府於德霞各州縣許  
以便宜行事以鎮安人心其新附之民中有異志者或  
遷之海北地方屯田或編入附近衛所戎籍如漢徙滬  
山蠻故事又擇仁明慈惠之長久任而安輯之則瓊人  
受萬世利矣疏下兵部議詔悉允行二十九年總兵官  
陳圭總督歐陽必進等督兵進勦斬賊五千三百八十  
級俘一千四十九人奪牛羊器械倍之招撫三百七十  
六人捷聞帝嘉其功賜圭必進祿米廕襲有差萬曆十  
四年長田峒黎出掠兵備道遣兵執戮之草子坡諸黎  
召衆來報復戰於長沙營斬黎首百餘級於是黃村田

明史卷三百十九  
尾諸峒黎皆出降瓊州黎人居五指山中者爲生黎不  
與州人交其外爲熟黎雜耕州地原姓黎後多姓王及  
符熟黎之產半爲湖廣福建奸民亡命及南恩藤梧高  
化之征夫利其土占居之各稱酋首成化間副使涂棐  
設計犁掃漸就編差弘治間符南蛇之亂連郡震驚其  
小醜侵突無時而息云

明史卷三百十九終

明史卷三百二十

列傳第二百八

總管總理事務 經筵講官保兼李太保保和殿大學士兼管吏部尚書事加六級張廷玉等奉

敕修

外國一

朝鮮

朝鮮箕子所封國也漢以前曰朝鮮始為燕人衛滿所據漢武帝平之置真番臨屯樂浪元菟四郡漢末有扶餘人高氏據其地改國號曰高麗又曰高句麗居平壤即樂浪也已為唐所破東徙後唐時王建代高氏兼併新羅百濟地徙居松岳曰東京而以平壤為西京其國



北鄰契丹西則女直南曰日本元至元中西京內屬置東寧路總管府盡慈嶺爲界明興王高麗者王顥太祖卽位之元年遣使賜璽書二年送還其國流人顥表賀貢方物且請封帝遣符璽郎俛斯齋詔及金印誥文封顥爲高麗國王賜曆及錦綺其秋顥遣總部尚書成惟得千牛衛大將軍金甲兩上表謝并賀天壽節因請祭服制度帝命工部製賜之惟得等辭歸帝從容問王居國何爲城郭修乎兵甲利乎宮室壯乎頓首言東海波臣惟知崇信釋氏他未遑也遂以書諭之曰古者王公設險未嘗去兵民以食爲天而國必有出政令之所今

有人民而無城郭人將何依武備不修則威弛地不耕則民艱於食且有居室無廳事無以示尊嚴此數者朕甚不取夫國之大事在祀與戎苟闕斯二者而徒事佛求福梁武之事可爲明鑑王國北接契丹女直而南接倭備禦之道王其念之因賜之六經四書通鑑自是貢獻數至元旦及聖節皆遣使朝賀歲以爲常三年正月命使往祀其國之山川是歲頒科舉詔於高麗顯表謝貢方物并納元所授金印中書省言高麗貢使多齎私物入貨宜征稅又多攜中國物出境禁之便俱不許五年表請遣子弟入太學帝曰入學固美事但涉海遠不

欲者勿強貢使洪師範鄭夢周等一百五十餘人來京失風溺死者三十九人師範與焉帝憫之遣元樞密使延安答里往諭入貢毋數而顓復遣其門下贊成事姜仁裕來貢馬其賀正旦使金湑等已先至帝悉遣還謂中書省臣曰高麗貢獻繁數旣困敝其民而涉海復虞覆溺宜遵古諸侯之禮三年一聘貢物惟所產毋過侈其明諭朕意六年顓遣甲兩等貢馬五十匹道亡其二甲兩以聞及進以私馬足之帝惡其不誠却之七年遣監門護軍周誼鄭庇等來貢表請每歲一貢貢道從陸由定遼毋涉海其貢物稱送太府監中書省言元時有

太府監本朝未嘗有言涉不誠帝命却其貢是歲顓爲  
權相李仁人所弑顓無子以寵臣辛肫之子禍爲子於  
是仁人立禍八年禍遣判宗簿事崔原來告哀且言前  
有貢使金義殺朝使蔡斌今嗣王禍已誅義籍其家帝  
疑其詐拘原而遣使往祭弔十年使來請故王顓諡號  
帝曰顓被殺已久今始請諡將假吾朝命鎮撫其民且  
掩其弑逆之跡不可許前所留使者其遣之於是釋原  
歸其夏復遣周誼貢馬及方物却不受冬又遣使賈明  
年正旦帝曰高麗王顓被弑奸臣竊命春秋之義亂臣  
必誅夫又何言第前後使者皆稱嗣王所遣中書宜遣

人往問嗣王如何政令安在若政令如前嗣王不爲羈  
囚則當依前王言歲貢馬千匹明年貢金百斤銀萬兩  
良馬百細布萬仍悉送還所拘遼東民方見王位真而  
政令行朕無惑已否則弑君之賊必討無赦十一年四  
月禍復命誼來貢十二年敕遼東守將潘敬葉旺等謹  
飭邊備其冬禍遣李茂芳等來貢以不如約却之十三  
年遼東送高麗使誼至京師帝敕敬等曰高麗弑君又  
殺朝使前堅請入貢又不如期今遣誼來以虛文飾詐  
他日必爲邊患自今來者其絕勿通因留誼於京師十  
六年來貢却之命禮部責其朝貢過期陪臣侮慢之罪

誠欲聽約者當以前五歲違約不貢之物并至十七年  
六月禍遣司僕正崔涓禮儀判書金進宜貢馬二千匹  
且言金非地所產願以馬代輸餘皆如約遼東守將唐  
勝宗爲之請帝許之然請顓諡號襲王爵未允也十八  
年正月貢使至帝諭禮臣曰高麗屢請約束朕數不允  
而其請不已故索歲貢以試其誠僞非以此爲富也今  
旣聽命宜損其貢數令三年一朝貢馬五十匹至二十  
一年正旦乃貢七月禍上表請襲爵并請故王諡命封  
禍爲高麗國王賜故王顓諡恭愍十九年二月遣使貢  
布萬匹馬千匹九月表賀貢方物其後貢獻輒踰常額

且未嘗至三年也冬詔遣指揮僉事高家奴以綺布市馬於高麗二十年三月高家奴還陳高麗表辭馬直帝敕如數償之先是元末遼瀋兵起民避亂轉徙高麗至是因市馬帝令就索之遂以遼瀋流民三百餘口來歸十二月命戶部咨高麗王鐵嶺北東西之地舊屬開元者遼東統之鐵嶺之南舊屬高麗者本國統之各正疆境毋侵越二十一年四月禍表言鐵嶺之地實其世守乞仍舊便帝曰高麗舊以鴨綠江爲界今飾辭鐵嶺詐僞昭然其以朕言諭之俾安分毋生釁端八月高麗千戶陳景來降言是年四月禍欲寇遼東使都軍相崔瑩

李成桂繕兵西京成桂使陳景屯艾州以糧不繼退師  
王怒殺成桂之子成桂還兵攻破王城囚王及瑩景懼  
及故降帝敕遼東嚴守備仍遣人偵之十月禍請遜位  
於其子昌帝曰前聞其王被囚此必成桂之謀姑俟之  
以觀變二十二年權國事昌奏乞入朝帝不許是歲成  
桂廢昌而立定昌國院君瑤二十三年正月遣使來告  
二十四年三月詔市馬高麗八月權國事瑤進所市馬  
千五百匹帝曰二韓君臣悖亂二紀於茲今王瑤嗣立  
乃王氏苗裔宜遣使勞之十二月瑤遣其子奭朝賀明  
年正旦奭未歸而成桂自立遂有其國瑤出居原州王



氏自五代傳國數百年至是絕二十五年九月高麗知密直司事趙胖等持國都評議司奏言本國自恭愍王薨無嗣權臣李仁人以辛旽子禍主國事昏暴好殺至欲興師犯邊大將李成桂以爲不可而回軍禍負罪惶懼遜位於子昌國人弗順啟請恭愍王妃安氏擇宗親瑤權國事已及四年昏戾信讒戕害勲舊子奭癡駭不慧國人謂瑤不足主社稷今以安氏命退瑤於私第王氏子姓無可當輿望者中外人心咸繫成桂臣等與國人耆老共推主國事惟聖主俞允帝以高麗僻處東隅非中國所治令禮部移諭果能順天道合人心不啟邊

覺使命往來實爾國之福我又何誅冬成桂聞皇太子  
薨遣使表慰并請更國號帝命仍古號曰朝鮮二十六  
年二月遣使進馬九千八百餘匹命運紵絲綿布一萬  
九千七百餘匹酬之六月表謝貢馬及方物并上前恭  
愍王金印請更己名曰旦從之是月遼東都指揮使司  
奏朝鮮國招引女直五百餘人潛渡鴨綠江欲入寇乃  
遣使敕諭示以禍福旦得敕惶懼陳謝上貢并械送逋  
逃軍民三百八十餘人至遼東二十七年旦遣子入貢  
二十八年遣使柳珣賀明年正旦帝以表文語慢詰責  
之珣言表文乃門下評理鄭道傳所撰遂命逮道傳釋

珣歸二十九年送撰表人鄭總等三人至云表實總等所撰道傳病不能行帝以總等亂邦構釁留不遣三十年冬復以表涉譏訕拘其使建文初旦表陳年老以子芳遠襲位許之成祖立遣官頒卽位詔永樂元年正月芳遠遣使朝貢四月復遣陪臣李貴齡入貢奏芳遠父有疾需龍腦沉香蘇合香油諸物齋布求市帝命太醫院賜之還其布芳遠表謝因請冕服書籍帝嘉其能慕中國禮賜金印誥命冕服九章圭玉珮玉妃珠翠七翟冠霞帔金墜及經籍綵幣表裏自後貢獻歲輒四五至焉二年十二月詔立芳遠子禔爲世子從其請也五年

十二月貢馬三千匹至遼東命戶部運絹布萬五千匹  
償之六年世子禔來朝賜織金文綺及歸帝親製詩賜  
之時朝鮮納女後宮立爲妃嬪者四人其秋遣陪臣鄭  
擢來告其父旦之喪命官弔祭賜諡康獻十六年奏世  
子禔不肖第三子禔孝弟力學國人所屬請立爲嗣詔  
聽王所擇因上表謝并陳已年老請以禔理國事命光  
祿少卿韓確鴻臚丞劉泉封禔爲朝鮮國王時帝已遷  
北都朝鮮益近而事大之禮益恭朝廷亦待以加禮他  
國不敢望也二十年芳遠卒賜諡恭定二十一年七月  
禔請立嫡子珣爲世子從之先是敕禔貢馬萬匹至是

如數至賜白金綺絹宣德二年三月遣中官賜白金紵紗別敕進馬五千匹資邊用九月如數至四年賜禱書珍禽異獸非朕所貴其勿獻後又敕禱金玉之器非爾國所產宜止之土物效誠而已八年禱奏遣子弟詣太學或遼東學帝不許賜五經四書性理通鑑綱目諸書正統元年三月放朝鮮婦女金黑等五十三人還其國金黑等自宣德初至京師至是遣中官送回三年八月賜禱遠游冠絳紗袍玉佩赤舄先是建州長童倉避居朝鮮界已復還建州朝鮮言昔以窮歸臣臣遇之善今負恩還建州李滿住所慮其同謀擾邊建州長言所部

爲朝鮮追殺阻留一百七十餘家五年詔禰還之七年五月諭禰曰鴨綠江一帶東寧等衛密邇王境中多細人逃至王國或被國人誘脅去者無問漢人女直至卽解京初瓦剌密令女直諸部誘朝鮮使背中國禰拒之白其事於朝帝嘉其忠敕獎之并賜綵幣九年春倭寇犯邊禰命將禽獲五十餘人械送京師十年又獲餘黨來獻帝連敕獎諭賜賚加等十三年冬命使調發朝鮮及野人女直兵會遼東征北寇時英宗北狩郕王卽位遣官頒詔於其國景泰元年貢馬五百匹奏稱奉敕辦馬二三萬匹比因鄰寇構鬻馬畜踣斃一時未能詔曰

寇今少息馬已至者償其直未至者止勿貢是年夏禩卒賜弔祭諡莊憲封子珦爲國王會遼東奏報開原瀋陽有寇入境掠人畜係建州海西野人女直頭目李滿住等爲嚮導因諭珦相爲犄角截殺之其秋續貢馬千五百餘匹賜冕服并償其直冬又賜珦及妃權氏誥命封其子弘曄爲世子二年冬以建州頭目潛與朝鮮通戒珦絕其使三年秋珦卒來告哀遣中官往弔祭賜諡恭順命子弘曄嗣立弘曄立三年以年幼且嬰夙疾請以叔璠權國事七年上表遜位乃封璠爲國王璠請立子曄爲世子從之天順三年邊將奏有建州三衛都督

私與朝鮮結恐爲中國患因敕瑑母作不靖貽後悔瑑  
疏辨復諭曰宣德正統年間以王國與彼互相侵掠敕  
解怨息兵初不令交通給賞授官也彼旣受朝廷官職  
王又加之是與朝廷抗也王素秉禮義何爾文過飾非  
後宜絕私交以全令譽四年復諭瑑曰王奏毛憐衛都  
督郎卜兒哈通謀煽亂已置之法夫法止可行於國中  
豈得加於鄰境郎卜兒哈有罪宜奏朝廷區處今輒行  
殺害何怪其子阿比車之思復讐也聞阿比車之母尚  
在宜急送遼東都司令阿比車領回以解讐怨五年建  
州衛野人至義州殺掠瑑奏乞朝命還所掠兵部議朝



鮮先嘗誘殺郎卜兒哈繼又誘致都指揮兀克縱兵掠其家屬今野人實係復讐宜諭朝鮮寇盜之來皆自取惟守分安法庶弭邊釁從之成化元年冬陪臣李門炯來朝卒於道命給棺賜祭并賜綵幣慰其家時朝鮮頻貢異物三年春敕諭瑑修常貢勿事珍奇是時朝廷用兵征建州敕瑑助兵進剿瑑遣中樞府知事康純統衆萬餘渡鴨綠潑豬二江攻破九獮府諸寨斬獲多四年正月遣官來獻俘詔從厚賚敕獎諭之是年瑑卒賜諡惠莊遣太監鄭同崔安封世子晄爲王給妃韓氏誥命旣行巡按遼東御史侯英奏曰遼東連年被寇瘡痍未

起今復禾稼不登軍民乏食太監鄭同等隨從人員所  
過驛騷臣考先年曾於翰林院中選有學行文望者出  
使今同安俱朝鮮人墳墓宗族皆在見其國王不免屈  
節殊褻中國體乞寢成命或翰林或給事中及行人內  
推選一員往使爲便帝曰英所言良是自後賞賚遣內  
臣其冊封正副使選廷臣有學行者六年耽病篤以所  
生子幼命其兄故世子暉之子婁權國事遣陪臣以聞  
及卒賜諡襄悼命婁嗣位婁妻韓氏封王妃十年追贈  
婁父世子暉爲國王諡懷簡母韓氏爲王妃從所請也  
十一年四月婁奏建州野人糾聚毛憐等衛侵擾邊境

不已乞朝命戒飭十二年十月婁爲繼妻尹氏請封賜  
誥命冠服時禁外國互市兵器婁奏小邦北連野人南  
鄰倭島五兵之用不可缺一而弓材所需牛角仰於上  
國高皇帝時嘗賜火藥火礮今望特許收買弓角不與  
外番同禁兵部議歲市弓角五十後以不足於用請無  
限額詔許倍市十五年十月命婁出兵夾擊建州女直  
婁遂遣右贊成魚有沼率兵至滿浦江以冰泮後期復  
遣左議政尹弼商節度使金嶠等渡江進勦十六年春  
遣陪臣來獻捷帝命內官齎敕獎其能繼先烈賜金幣  
領兵官賞賚如例後使還遣其臣許熙伴送熙歸至開

州建州騎二千邀之掠其從卒三十餘人馬二百三十餘匹他所亡物稱是奏聞英國公張懋吏部尚書尹旻等以遼東連年用兵未可輕動宜以此意諭妾救遼東守臣整飭邊備更令譯者窮究所掠期在必得仍賜熙白金綵幣慰安之十七年妾奏繼妃尹氏失德廢置乞更封副室尹氏從之十九年四月封妾長子懔爲世子弘治七年十二月妾卒賜諡康靖明年四月封懔爲國王妻慎氏爲王妃十二年懔奏本國人屢有違禁匿海島誘引軍民漸至滋蔓乞許本國自行搜刷其係上國地方請敕官追捕時遼東守臣亦奏如懔言報可十五

年冬封懽長子顥爲世子正德二年懽以世子顥夭亡哀慟成疾奏請以國事付其弟懌其國人復奏請封懌禮部議命懌權理國事俟懽卒乃封既陪臣盧公弼等以朝貢至京復請封懌廷議不允十二月懽母妃奏懌長且賢堪付重寄於是禮部奏懽以痼疾辭位懌以親弟承托授受旣明友愛不失通國臣民舉無異詞宜順其請上乃允懌嗣位遣中官敕封并賜其妃尹氏誥命初成桂之自立也與宰相李仁人本異族永樂閒降祭海嶽祝文稱成桂爲仁人子而祖訓亦載仁人子成桂更名曰後成桂子芳遠奏辨太宗許令改正至是修大

明會典仍列祖訓於朝鮮國貢使市以歸懌上疏備陳世系辨先世無弑逆事乞改正禮部議會典詳載本朝制度事涉外國疑似之際在所畧况成桂得國出皇祖命其不繫仁人後太宗詔可徵宜從其請詔曰可十五年冬命內官封懌子皓爲世子賜懌金帛珠玉令括取異物及童男女以進十六年世宗卽位禮官言天子初踐祚宜正中國之體絕外裔狎侮之端請諭懌非朝廷意召內臣還母有所索取帝從之嘉靖二年八月以俘獲倭夷來獻并送還中國被掠八人賜白金錦紵八年八月陪臣柳溥上言國祖李旦係本國全州人二十八

世祖瀚仕新羅爲司空新羅亡六世孫兢休入高麗十  
三世孫安社仕元爲南京千戶所達魯花赤元季兵興  
安曾孫子春與男成桂避地東遷至正辛丑當恭愍王  
之十年有紅巾賊入境成桂擊賊有功授武班職事時  
尚未知名恭愍無嗣陰蓄寵臣辛旽之子禍爲子晚爲  
嬖臣洪倫內豎崔萬生所弑權臣李仁人誅倫萬生而  
立禍擢成桂爲門下侍中禍遣成桂侵遼東成桂不從  
返兵禍懼遜位於子昌昌以僞姓見黜復立王氏裔定  
昌君瑤竄仁人於外瑤復不道國人戴成桂請於高皇  
帝立爲王更名曰贍瑤別邸終其身實未嘗爲弑前承

樂正德間屢經奏請俱蒙俞允而迄未改正今遇重修會典乞賜昭雪詔送史館編纂十八年二月睿宗祔太廟配享明堂禮成懌表賀帝特御奉天門引見賜宴禮部二十三年冬懌卒二十四年正月來訃賜諡恭僖詔立其子皓皓未踰年卒賜諡榮靖九月皓弟權國事暉遣使謝祭諡并請襲封詔許之二十五年暉遣使送下海番人六百餘至邊賜金幣二十六年正月暉咨稱福建人從無泛海至本國者因往日本市易爲風所漂前後共獲千人以上皆挾軍器貨物致中國火礮亦爲倭有恐起兵端詔頃年沿海奸民犯禁福建尤甚往往爲



外國所獲有傷國體海道官員令巡按御史察叅仍賜王銀幣以旌其忠三十一年冬以洪武永樂間所賜樂器敝壞奏求律管更乞遣樂官赴京校習許之三十五年五月有倭船四自浙直敗還漂入朝鮮境岨遣兵擊殲之得中國被俘及助逆者三十餘人來獻因賀冬至節帝賜璽書褒諭三十八年十一月奏今年五月有倭寇駕船二十五隻來抵海岸臣命將李鐸等勦殺殆盡獲中國民陳春等三百餘人內招通倭嚮導陳得等十六人俱獻闕下復降敕獎勵厚賚銀幣并賜鐸等有差四十二年九月岨復上書辨先世非李仁人後今修會

典雖蒙釐正乞著始祖旦父子春之名帝令附錄會典  
隆慶元年六月遣官頒卽位詔時帝將幸太學來使乞  
留觀禮許之是年冬恒卒賜諡恭憲命其姪昞襲封萬  
曆元年正月上穆宗尊諡兩宮徽號禮成昞表賀獻方  
物馬匹時昞屢請賜皇明會典爲其先康獻王旦雪冤  
十六年正月會典成適貢使愈泓在京請給前書以終  
前命許之十七年十一月陪臣奇岑等入賀冬至奏稱  
本年六月大琉球國船遭風至海岸所有男婦合解京  
給文放歸從之十九年十一月奏倭酋關白平秀吉聲  
言明年三月來犯詔兵部申飭海防平秀吉者薩摩州

人初隨倭關白信長會信長爲其下所弑秀吉遂統信  
長兵自號關白劫降六十餘州朝鮮與日本對馬島相  
望時有倭夷往來互市二十年夏五月秀吉遂分渠帥  
行長清正等率舟師逼釜山鎮潛渡臨津時朝鮮承平  
久兵不習戰暇又酒酒弛備猝島夷作難望風皆潰暇  
棄王城令次子琿攝國事奔平壤已復走義州願內屬  
七月兵部議令駐劄險要以待天兵號召通國勤王以  
圖恢復而是時倭已入王京毀墳墓劫王子陪臣剽府  
庫八道幾盡沒旦暮且渡鴨綠江請援之使絡繹於道  
廷議以朝鮮爲國藩籬在所必爭遣行人薛潘諭暇以

興復大義揚言大兵十萬且至而倭業抵平壤朝鮮君臣益急出避愛州遊擊史儒等率師至平壤戰死副總兵祖承訓統兵渡鴨綠江援之僅以身免中朝震動以宋應昌爲經畧八月倭入豐德等郡兵部尚書石星計無所出議遣人偵探之於是嘉興人沈惟敬應募惟敬者市中無賴也是時秀吉次對馬島分其將行長等守要害爲聲援惟敬至平壤執禮甚卑行長給曰天朝幸按兵不動我不久當還以大同江爲界平壤以西盡屬朝鮮耳惟敬以聞廷議倭詐未可信乃趣應昌等進兵而星頗惑於惟敬乃題署遊擊赴軍前且請金行間十

二月以李如松爲東征提督明年正月如松督諸將進戰大捷於平壤行長渡大同江遁還龍山所失黃海平安京畿江源四道竝復清正亦遁還王京如松旣勝輕騎趨碧蹄館敗退駐開城事具如松傳初如松誓師欲斬惟敬以參軍李應試言而止至是敗氣縮而應昌急圖成功倭亦乏食有歸志因而封貢之議起應昌得倭報惟敬書乃令遊擊周弘謨同惟敬往諭倭獻王京返王子如約縱歸倭果於四月棄王城遁時漢江以南千有餘里朝鮮故土復定兵部言宜令王還國居守我各鎮兵久疲海外以次撤歸爲便詔可應昌疏稱金山雖

瀕海南猶朝鮮境有如倭覘我罷兵突入再犯朝鮮不  
支前功盡棄今撥兵協守爲第一策卽議撤宜少需俟  
倭盡歸量留防戍部議留江浙兵五千分屯要害仍論  
叵蒐練軍實毋恃外援已而沈惟敬歸自金山同倭使  
來請款而倭隨犯咸安晉州逼全羅聲復漢江以南以  
王京漢江爲界如松計全羅饒沃南原府尤其咽喉乃  
命諸將分守要害已倭果分犯我師竝有斬獲兵科給  
事中張輔之遼東都御史趙燿皆言款貢不可輕受七  
月倭從釜山移西生浦送回王子陪臣時師久暴露聞  
撤勢難久羈應昌請留劉綎川兵吳惟忠駱尚志等南

兵合薊遼兵共萬六千聽縱分布慶尚之大邱月餉五萬兩資之戶兵二部先是發帑給軍費已累百萬廷臣言虛內實外非長策請以所留川兵命縱訓練兵餉令本國自辦於是詔撤惟忠等兵止留縱兵防守諭朝鮮世子臨海君肆居全慶以顧養謙爲經畧九月昞以三都旣復疆域再造上表謝恩然時倭猶據釜山也星益一意主款九月兵部主事曾偉芳言關白大衆已還行長留待知我兵未撤不敢以一矢加遺欲歸報關白捲土重來則風不利正苦冬寒故款亦去不款亦去沈惟敬前於倭營講購咸安晉州隨陷而欲恃款冀來年不

攻則速之款者正速之來耳故款亦來不款亦來宜令  
朝鮮自爲守弔死問孤練兵積粟以圖自強帝以爲然  
因敕諭昞者甚至二十二年正月昞遣金晬等進方物  
謝恩禮部郎中何喬遠奏晬涕泣言倭寇猖獗朝鮮束  
手受刃者六萬餘人倭語悖慢無禮沈惟敬與倭交通  
不云和親輒曰乞降臣謹將萬曆十九年中國被掠人  
許儀所寄內地書倭夷答劉綎書及歷年入寇處置之  
宜乞特敕急止封貢詔兵部議時廷臣交章皆以罷封  
貢議戰守爲言八月養謙奏講貢之說貢道宜從寧波  
關白宜封爲日本王諭行長部倭盡歸與封貢如約九



月昞請許保國帝乃切責羣臣阻撓追褫御史郭實等詔小西飛入朝集多官面議要以三事一勒倭盡歸巢一旣封不與貢一誓無犯朝鮮倭俱聽從以聞帝復諭於左闕語加周複十二月封議定命臨淮侯李宗城充正使以都指揮楊方亨副之同沈惟敬往日本王給金印行長授都督僉事二十三年九月昞奏立次子瑋爲嗣先是昞庶長子臨海君肆陷賊中驚憂成疾次子光海君瑋收集流散頗著功績奏請立之禮部尚書范謙言繼統大義長幼定分不宜僭差遂不許至是復奏引永樂間恭定王例上請禮臣執奏不從二十四年五月

昡復疏請立琿禮部仍執不可詔如議時國儲未建中外恫疑故尚書范謙於朝鮮易封事三疏力持云九月封使至日本先是沈惟敬抵釜山私奉秀吉蟒玉翼善冠地圖武經良馬而李宗城以貪淫爲倭守臣所逐棄璽書夜遁事聞逮問乃以方亨充正使加惟敬神機營銜副之及是奉冊至關白怒朝鮮王子不來謝止遣二使奉白土綢爲賀拒其使不見語惟敬曰若不思二子三大臣三都八道悉遵天朝約付還今以卑官微物來賀辱小邦邪辱天朝邪且留石曼子兵於彼候天朝處分然後撤還翌日奉貢遣使賫表文二道隨冊使渡海

至朝鮮廷議遣使於朝鮮取表文進驗其一謝恩其一  
乞天子處分朝鮮初方亨詭報去年從釜山渡海倭於  
大版受封卽回和泉州然倭方責備朝鮮仍留兵釜山  
如故謝表後時不發方亨徒手歸至是惟敬始投表文  
案驗潦草前折用豐臣圖書不奉正朔無人臣禮而寬  
奠副總兵馬棟報清正擁二百艘屯機張營方亨始直  
吐本末委罪惟敬并呈石星前後手書帝大怒命逮石  
星沈惟敬案問以兵部尚書邢玠總督薊遼改麻貴爲  
備倭大將軍經理朝鮮僉都御史楊鎬駐天津申警備  
楊汝南丁應泰贊畫軍前五月玠至遼行長建樓清正

布種島倭窖水索朝鮮地圖玠遂決意用兵麻貴望鴨  
綠江東發所統兵僅萬七千人請濟師玠以朝鮮兵惟  
嫺水戰乃疏請募兵川浙并調薊遼宣大山陝兵及福  
建吳淞水師劉綎督川漢兵聽勦貴密報候宣大兵至  
乘倭未備掩釜山則行長禽清正走玠以爲奇計乃檄  
楊元屯南原吳惟忠屯忠州六月倭數千艘泊釜山戮  
朝鮮郡守安弘國漸逼梁山熊川惟敬率營兵二百出  
入釜山玠陽爲慰藉檄楊元襲執之縛至貴營惟敬執  
而嚮導始絕七月倭奪梁山三浪遂入慶州侵閑山統  
制元均兵潰遂失閑山閑山島在朝鮮西海口右障南

原爲全羅外藩一失守則沿海無備天津登萊皆可揚帆而至而我水兵三千甫抵旅順閑山破經畧檄守王京西之漢江大同江扼倭西下兼防運道八月清正圍南原乘夜猝攻守將楊元遁時全州有陳愚衷去南原僅百里南原告急愚衷不敢救聞已破棄城走麻貴遣遊擊牛伯英赴援與愚衷合兵屯公州倭遂犯全慶逼王京王京爲朝鮮八道之中東阻烏嶺忠州西則南原全州道相通自二城失東西皆倭我兵單弱因退守王京依險漢江麻貴請於玠欲棄王京退守鴨綠江海防使蕭應宮以爲不可自平壤兼程趨王京止之麻貴發

兵守稷山朝鮮亦調都體察使李元翼由烏嶺出忠清道遮賊鋒玠旣身赴王京人心始定玠召參軍李應試問計應試請問廟廷主畫云何玠曰陽戰陰和陽勦陰撫政府八字密畫無泄也應試曰然則易耳倭叛以處分絕望其不敢殺楊元猶望處分也直使人諭之曰沈惟敬不死則退矣因請使李大諫於行長馮仲纓於清正玠從之九月倭至漢江楊鎬遣張貞明持惟敬手書往責其動兵有乖靜候處分之實行長正成亦允清正輕舉乃退屯井邑麻貴遂報青山稷山大捷蕭應宮揭言倭以惟敬手書而退青山稷山并未接戰何得言功

玠鎬怒遂劾應宮懼不親解惟敬竝逮十一月玠徵  
兵大集帝發帑金犒軍賜玠尚方劍而以御史陳效監  
其軍玠大會諸將分三協鎬同貴率左右協自忠州烏  
嶺向東安趨慶州專攻清正使李大諫通行長約勿往  
援復遣中協屯宜城東援慶州西扼全羅以餘兵會朝  
鮮合營詐攻順天等處以牽制行長東援十二月會慶  
州麻貴遣黃應賜賄清正約和而率大兵奄至其營時  
倭屯尉山城依山險中一江通釜寨其陸路由彥陽通  
釜山貴欲專攻尉山恐釜倭由彥陽來援乃多張疑兵  
又遣將遏其水路遂進逼倭壘遊擊擺寨以輕騎誘倭

入伏斬級四百餘獲其勇將乘勝拔兩柵倭焚死者無  
算遂奔島山連築三寨翌日遊擊茅國器統浙兵先登  
連破之斬獲甚多倭堅壁不出島山視尉山高石城堅  
甚我師仰攻多損傷諸將乃議曰倭艱水道餉難繼第  
坐困之清正可不戰縛也鎬等以爲然分兵圍十日夜  
倭饑甚僞約降緩攻俄行長援兵大至將繞出軍後鎬  
不及下令策馬西奔諸軍皆潰遂撤兵還王京士卒物  
故者二萬上聞之震怒乃罷鎬聽勘以天津巡撫萬世  
德代事詳鎬傳二十六年正月邢玠以前役乏水兵無  
功乃益募江南水兵議海運爲持久計二月都督陳璘



以廣兵劉綰以川兵鄧子龍以浙直兵先後至玠分兵  
三協爲水陸四路路置大將中路如梅東路貴西路綰  
水路璘各守汛地相機行勦時倭亦分三窟東路則清  
正據尉山西路則行長據粟林曳橋建砦數重中路則  
石曼子據泗州而行長水師番休濟餉往來如駛我師  
約日竝進尋報遼陽警李如松敗沒詔如梅還赴之中  
路以董一元代當應泰之劾鎬也叅請回乾斷崇勵鎮  
撫以畢征討上不許又應曾以築城之議爲鎬罪案謂  
堅城得志啟朝鮮異日之患於是叅奏辨帝曰連年用  
兵發餉以爾國素効忠順故也毋以人言自疑九月將

士分道進兵劉縉進逼行長營約行長爲好會翌日攻城斬首九十二陳璘舟師協堵擊毀倭船百餘行長潛出千餘騎扼之縉不利退璘亦棄舟走麻貴至尉山頗有斬獲倭僞退誘之貴入空壘伏兵起遂敗董一元進取晉州乘勝渡江連燬二寨倭退保泗州老營鏖戰下之前逼新寨寨三面臨江一面通陸引海爲濠海艘泊寨下千計築金海固城爲左右翼十月董一元遣將四面攻城用火器擊碎寨門兵競前拔柵忽營中火藥崩烟燄漲天倭乘勢衝擊固城倭亦至兵遂大潰奔還晉州帝聞命斬二遊擊以徇一元等各帶罪立功是月福

建都御史金學會報七月九日平秀吉死各倭俱有歸志十一月清正發舟先走麻貴遂入島山西浦劉綎攻奪曳橋石曼子引舟師救行長陳璘邀擊敗之諸倭揚帆盡歸自倭亂朝鮮七載喪師數十萬糜餉數百萬中朝與屬國迄無勝算至關白死而禍始息二十七年四月以平倭詔告天下又敕諭昞曰倭奴平秀吉肆爲不道蹂躪爾邦朕念王世篤忠貞深用憫惻七年之中日以此賊爲事始行薄伐繼示包容終加嚴討蓋不殺乃天之心而用兵非予得已安疆靖亂宜取蕩平神惡凶盈陰殲魁首大師乘之追奔逐北鯨鯢盡戮海隅載清

捷書來聞憂勞始釋惟王雖還舊物實同新造振凋起  
敝爲力倍艱倭雖遁歸族類尚在茲命邢玠振旅歸京  
量留萬世德等分布戍守王宜卧薪嘗膽無忘前恥惟  
忠惟孝續紹前休五月玠條陳東征善後事宜十事一  
留戍兵馬步水陸共計三萬四千有奇馬三千匹一定  
月餉每年計銀九十一萬八千有奇一定本色合用米  
豆分派遼東天津山東等處每年十二萬石一留中都  
海防道一裁餉司一重將領一添巡捕一分汛地一議  
操練一責成本國廷臣議數年疲耗今始息肩自宜內  
固根本不當更爲繁費况彼國兵荒之後不獨苦倭之

國史卷三十一 死節 三十一  
擾兼苦我兵故今日善後事宜仍當商之彼國先量彼  
餉之贏絀始可酌我兵之去留至於增買馬匹添補標  
兵創立巡捕以至管餉府佐悉宜停止帝命督撫會同  
國王酌奏八月昞獻方物助大工褒賞如例十月請留  
水兵八千以資戍守其撤回官兵駐劄遼陽備警二十  
八年四月請將義州等倉遺下米豆運回遼陽戶部議  
輸運維艱莫若徑與彼國振其彫敝以昭皇仁詔曰可  
二十九年二月兵部覆奏經督條陳七事一練兵士麗  
人鷙悍耐寒苦而長衫大袖訓練無方宜以束伍之法  
教之一守衝要朝鮮三面距海金山與對馬相望巨濟

次之宜各守以重兵并尉山開山等處皆宜戍守一修險隘王京北倚叢山南環滄海忠州左右烏竹二嶺羊腸繞曲有一夫當關之險今營壘遺址尚存亟宜修葺一建城池朝鮮八道十九無城平壤西北鴨浪二江俱南通海倘倭別遣一旅占據平壤則王京聲援斷絕皆應修築屯聚一造器械倭便戰陸不便海以船制重大不利攻擊今准福唬造百十艘爲奇兵并添造神機百子大箭一訪異材朝鮮貴世官賤世役一切禁錮往往走倭走敵爲本國患宜破格搜採一修內治國家東南臨海以登旅爲門戶鎮江爲咽喉應援之兵不宜盡撤

我自固亦所以固朝鮮也詔朝鮮刻勵以行九月奏所  
願誥命冕服遭變淪失祈補給從之時倭國內亂對馬  
島主平義智悉遣降人還朝鮮遺書乞和且揚言秀吉  
將家康將輸糧數十萬石爲軍興資以脅朝鮮朝鮮與  
對馬島一水相望島地不產五穀資米於朝鮮兵興後  
絕開市因百計脅款秀吉死我軍盡撤朝鮮畏倭滋甚  
欲與倭通款又懼開罪中國十二月昞以島倭求款來  
請命兵部以事難遙度令總督世德酌議詔可三十年  
十一月昞言倭使頻來要挾和款兵端漸露乞選將率  
兵督同本國訓練修防帝曰曾留將士教習成法具在

無容再遣因命其使臣齎敕誠勵三十三年九月昞復請封琿爲世子禮部仍執立長之議三十五年四月昞以家康求和來告兵部議聽王自計而已由是和款不絕後二年始畫開市之事三十六年昞卒光海君琿自稱署國事遣陪臣來訃且請諡帝惡其擅不允令該國臣民公議以聞時我

大清兵征服各部漸近朝鮮兵部議令該王大修武備整飭邊防并請敕遼左督撫鎮臣遣官宣達毋相侵犯之意從之十月封琿爲國王從其臣民請也三十七年二月諡昞曰昭敬遣官賜琿及妃柳氏誥命初朝鮮失



守賴中國力得復倭棄金山遁然陰謀啟疆爲患不已於是海上流言倭圖金山朝鮮與之通四十一年九月總兵官楊宗業以聞琿疏辨詔慰解之四十二年四月奏請追封生母金氏禮部按會典嫡母受封而生母先亡者得追贈乃命封爲國王次妃四十三年十一月表賀冬至因奏買回吾學編彙山堂別集等書載本國事與會典乖錯乞改正禮部言野史不足憑今所請恥與逆黨同譏宜憫其誠宣付史館報可初琿爲生母已得封至是復祈給冠服禮臣以金氏側室禮有隆殺執不可四十五年正月琿請至再帝以琿屢次懇陳勉從之

四十七年楊鎬督馬林杜松劉綎等出師爲我

大清兵所敗朝鮮助戰兵將或降或戰死琿告急詔加  
優恤十一月兵部覆朝鮮入貢之道宜添兵防守詔鎮  
江等處設兵將令經畧熊廷弼調委四十八年正月琿  
奏敵兵八月中攻破北關金台吉自焚白羊出降鐵嶺  
之役蒙古宰賽亦爲所滅聞其國謀議以朝鮮北關宰  
賽皆助兵南朝今北關宰賽皆滅不可使朝鮮獨存又  
聞設兵牛毛寨萬遮嶺欲畧寬奠鎮江等處寬奠鎮江  
與昌城義州諸堡隔水相望孤危非常敵若從饜陽境  
上鴉鶻關取路遶出鳳凰城裏一日長驅寬鎮昌城俱

莫自保內而遼左八站外而東江一城彼此隔斷聲援阻絕可爲寒心望速調大兵共爲犄角以固邊防時遼鎮塘報稱朝鮮與

大清講和朝議遂謂琿陽衡陰順宜遣官宣諭或命將監護其說紛拏琿疏辨二百年忠誠事大死生一節詞極剴摯禮兵二部請降敕令曉諭以安其心帝是其議然敕令陪臣往不遣官也天啟元年八月改朝鮮貢道自海至登州直達京師時毛文龍以總兵鎮皮島招集逃民爲兵而仰給於朝鮮十一月琿奏力難餽餉乞循萬曆東征例發運山東粟從之三年四月國人廢琿而

立其姪綾陽君侗以昭敬王妃之命權國事令議政府  
移文督撫轉奏文龍爲之揭報登州巡撫袁可立上言  
琿果不道宜聽太妃具奏以待中國更立疏留中八月  
王妃金氏疏請封侗禮部尚書林堯俞言朝鮮廢立之  
事內外諸臣抒忠發憤有謂宜聲罪致討者有謂勿遽  
討且受方貢覈顛末者或謂當責以大義察輿情之向  
背者或謂當令侗討敵自洗者衆論咸有可采其謂琿  
實悖德侗討叛臣以赤心奉朝廷者惟文龍一人耳皇  
上奉天討逆扶植綱常此正法也母亦念彼素稱恭順  
迥異諸裔則更遣貞士信臣會同文龍公集臣民再四

詢訪勘辨旣明再請聖斷報可十二月禮部復上言臣前同兵部移咨登撫并劄毛帥遣官往勘今據申送彼國公結十二道自宗室至八道臣民共稱侂爲恭順且彼之陪臣相率哀籲謂當此危急之秋必須君國之主乞先頒敕諭令侂統理國事仍令發兵索賦同文龍設伏出奇俟漸有次第始遣重臣往正封典庶幾字小之中不失固圉之道從之四年四月封侂爲國王五年十二月文龍報朝鮮逆黨李适韓明璉等起兵昌城直趨王京被臣禽獲餘孽韓潤鄭梅等竄入建州有左議府尹義立約爲內應期今冬大舉犯朝鮮臣已咨國王防

守暫移鐵山之衆就雲從島柴薪登萊巡撫武之望奏  
毛帥自五月以來營室於須彌所謂雲從島是也今十  
月又徙兵民商賈以實之而鐵山之地空矣故朝鮮各  
道疑其有逼處之嫌甚至布兵以防禦之今鎮臣所稱  
李适等之叛尹義立之內應臣等微聞之而未敢遽信  
焉信之則益重鮮人之疑不信則恐貽後來之患兵部  
言牽制敵國者朝鮮也聯屬朝鮮者毛鎮也駕馭毛鎮  
者登撫也今撫臣與鎮臣不和以至鎮臣與屬國不和  
大不利帝乃飭勉鎮撫同心而韓潤尹義立等令朝鮮  
自處侖又請撤遼民安插中土兵部言遼人去留文龍

是視文龍一日不去則遼人一日不離鮮人驅之入島可也驅之離島不可也宜令鎮臣將遼民盡刷過島登撫刻期運糧朝鮮量行救振以資屯牧帝是之六年十月侂上疏曰皇朝之於小邦覆幬之恩視同服內頃遭昏亂潛通敵國皇天震怒降黜厥命臣自權署之初不敢違寧卽命陪臣張晚爲帥李适副之付以國中精銳進屯寧邊一聽毛鎮節制以候協勦之期而适重兵在握潛蓄覬覦遂與龜城府使明璉舉兵內叛直犯京城晚收餘兵躡其後與京輔官兵表裏夾攻賊皆授首而西邊軍實及列鎮儲侍罄於是役矣毛鎮當全遼淪沒

之後孤軍東渡寄寓海上招集遼民前後數十萬亦小  
邦所仰藉也顧以封疆多故土瘠民貧內供本國之軍  
需外濟鎮兵之待哺生穀有限支給實難遼民迫於饑  
餒散布村落强者攫奪弱者丐乞小邦兵民被撓不堪  
拋棄鄉邑轉徙內地遼民逐食亦隨而入自昌義以南  
安肅以北客居六七主居三四向者將此情形具奏見  
兵部題覆處分已定何敢再干至韓潤及弟潭係逆賊  
明璉子姪亡命潛逃因而勾引來寇賊旣叛國而去制  
命已不在臣尹義立曾任判書本非議政頃年差爲毛  
鎮接伴官不稱任使褫職歸家竝無怨叛之事毛鎮據



王仲保等所訴都無實事意必有讒邪之臣欺妄督撫以售其交構之計者毛帥久鎮海外臣與周旋已近十稔雖餼牽將竭彼此俱困而情誼之殷實無少損且其須彌之遷直爲保護累重將以就便芻薪一進一退兵家常事訛言噂沓本不介意竊見部撫移咨曰虞其逼處曰驅其民驅其帥甚至有布兵以防屬國攜貳之語似海外情事未盡諒悉臣之請刷遼民因力不足濟初非慮及逼處也臣方與毛鎮同心一力建功報主豈敢有一毫猜防意乎帝報曰王和協東鎮愛戴中朝忠貞之忱溢乎言表鎮軍久懸鮮遼雜處久客累主生寡食

多微王言朕有不坐照萬里之外者然毛帥在中朝爲牽制之師在王國則唇齒之形也海上芻輓已令該部區畫刻期運濟逃難邊民亦令毛帥悉心計處俾無重爲王累傳訛之言未足介懷并力一心王其勉之七年三月兵部上文龍揭言麗官麗人招敵攻鐵山傷我兵千人殺麗兵六萬焚糧百餘萬敵遂移兵攻麗矣帝敕文龍速相機應援登撫李嵩奏朝鮮叛臣韓潤等引敵入安州節度使南以興自焚死中國援兵都司王三桂等俱陣亡旣復奏義州及郭山凌漢山城俱破平壤黃州不戰自潰敵兵直抵中和遊騎出入黃鳳之間又分

向雲從攻掠毛帥國王及士民遷於江華以避難時

大清兵所至輒下朝鮮列城望風奔潰乃遣使諭倥倥輸款遂班師九月倥奏被兵情形時熹宗崩莊烈帝嗣位優詔勵勉焉崇禎二年改每歲兩貢爲一貢先是遼路阻絕貢使取道登萊已十餘年矣自袁崇煥督師題改覺華迂途冒險其國屢請復故至是遣戶曹判書鄭斗源從登海來移書登撫孫元化屬其陳請元化委官伴送仍疏聞帝以水路既有成命改途嫌於自便不許是年六月督師袁崇煥殺平遼將軍左都督毛文龍於雙島六年六月倥遺書總兵黃龍言文龍舊將孔有德

耿仲明率士卒二萬投順

大清向朝鮮徵糧本國以有德等曩在皮島爲本國患故未之應龍以聞十年正月

太宗文皇帝親征朝鮮責其渝盟助明之罪列城悉潰朝鮮告急命總兵陳洪範調各鎮舟師赴援三月洪範奏官兵出海越數日山東巡撫顏繼祖奏屬國失守江華已破世子被禽國王出降今大治舟艦來攻皮島鐵山其鋒甚銳宜急救沈世魁陳洪範二鎮臣以堅守皮島爲第一義帝以繼祖不能協圖匡救切責之亡何皮島竝爲

明史卷三百二十一 列傳 三十一  
大清兵所破朝鮮遂絕不數載而明亦亡矣朝鮮在明雖稱屬國而無異域內故朝貢絡繹錫賚便蕃殆不勝書止著其有關治亂者於篇至國之風土物產則具載前史茲不復錄

明史卷三百二十一終